

BAB IV

AL-QURAN DAN METODOLOGINYA DALAM MENANGANI DAN MENGUBATI PENYAKIT SOSIAL DAN KRISIS MORAL

4.1 Pengenalan

Isi kandungan al-Qur'an amatlah lengkap dan sempurna, ianya menyentuh semua aspek kehidupan manusia sama ada di dunia dan akhirat, aspek ibadat dan muamalat. Semua persoalan yang menyentuh kehidupan manusia telah diatur dan segala penyakitnya dapat diubati dengan petunjuk al-Qur'an. Matlamat al-Qur'an ialah untuk menjadikan dunia yang unggul akhlakunya, mempunyai perasaan yang murni, pergaulan dan tingkah laku yang bersih. Al-Qur'an telah membawa sistem yang sempurna yang mengandungi prinsip serta metodologi yang menjadi pergantungan dunia ini. Begitu juga ia membawa asas-asas serta dasar-dasar yang menjamin kehidupan manusia serta melindunginya.

Pada bab ini akan dibahaskan maksud dan pengertian metodologi al-Qur'an sama ada dari segi etimologi dan pengertiannya menurut mufassirin. Kemudian akan dipaparkan pula metod-metod yang digunakan al-Qur'an dalam menangani permasalahan penyakit sosial dan krisis moral.

4.2 Al-Qur'an Panduan Hidup Seluruh Masyarakat

Dalam menghadapi berbagai-bagai penyakit sosial dan kehancuran akhlak serta moral kebelakangan ini, maka orang semakin sedar bahawa masyarakat moden dengan segala kemajuan yang menandainya tidak dapat melahirkan rasa aman dan tenteram atau paling tidak ramai yang merasa bahawa ada sesuatu yang hilang dari dalam diri mereka. Kerana itu muncullah dari pelbagai kalangan upaya pencarian untuk menemukan kembali apa yang terasa hilang pada diri mereka itu.

Apa yang sepatutnya dilakukan adalah kembali kepada al-Qur'an . Al-Qur'an merupakan sumber rujukan utama yang menempati posisi sentral bagi seluruh permasalahan dan ubat penawar terhadap pelbagai jenis penyakit. Termasuklah penyakit sosial dan krisis moral yang tengah bermaharajalela.

Dalam membendung dan mengubati penyakit sosial dan krisis moral ini al-Qur'an mempunyai metodenya yang tersendiri. Al-Qur'an disamping menjadi *hudā* (petunjuk), juga *bayyinā min al-hudā* (penjelasan bagi petunjuk-petunjuk itu) serta menjadi *furqān* (tolak ukur pemisah antara yang benar dan yang salah).

Akan tetapi, realiti yang berlaku, ramai orang yang menolak jika dikatakan al-Qur'an dapat menjadi panduan hidup masyarakat moden, masyarakat berteknologi seperti sekarang ini. Anggapan seperti ini terutamanya datang dari mereka yang menamakan dirinya kaum moden. Menurut dakwaan mereka, tidak akan mungkin sebuah kitab suci yang diturunkan 15 abad silam untuk mengatur masyarakat terkebelakang di gurun pasir Arab akan dapat menjadi panduan hidup masyarakat moden bertamadun yang serba canggih dengan teknologinya yang menjulang tinggi, masyarakat yang mereka juluki sebagai masyarakat beradab.

Yang telah sampai ke puncak kemajuan pengetahuan dan material. Mereka beranggapan bahawa al-Qur'an hanya tepat untuk mengatur masyarakat badwi yang bodoh dan terbelakang. Bahkan mereka telah membuat batasan, bahawa abad ini adalah era sains dan teknologi, sedangkan era agama termasuk yang diajarkan al-Qur'an sudah ketinggalan zaman¹.

Mereka berkeyakinan bahawa al-Qur'an tidak akan mampu menjawab masalah masyarakat moden kerana usianya sudah 15 abad, dan dakwaan mereka juga bahawa al-Qur'an tidak akan mampu menggantikan konsep hidup masyarakat moden yang sudah kukuh (*establish*) dan juga tidak akan mampu memberikan alternatif kepada sistem pendidikan, ekonomi, politik, sosial budaya, falsafah dan semua hasil masyarakat moden lainnya.

Pada kenyataannya masih ramai orang yang meragui kemampuan al-Qur'an untuk menyelesaikan krisis manusia moden. Bahkan ada pula di kalangan kaum muslimin sendiri berusaha mencari konsep-konsep selainnya dan menolak ajakan kembali kepada al-Qur'an

Jika ditelaah sistem kehidupan masyarakat sebelum diturunkan al-Qur'an yang dikatakan sebagai masyarakat *jahiliah*, maka akan tampak suatu kenyataan bahawa mereka ini dikatakan jahiliah bukanlah kerana mereka tidak memiliki perbendaharaan ilmu, tamadun ataupun teknologi. Bahkan pada zaman itu telah wujud tamadun-tamadun agung yang dikagumi sampai ke hari ini. Jelas zaman yang dimaksudkan sebagai zaman jahiliah itu bukannya jahil dalam erti kata

¹ Helmy Bakar al-Mascaty (1995). *Generasi Penyelamat Ummah*. Berita Publishing Sdn.Bhd. h.11

tamadun ataupun teknologi, sehingga perlu diturunkan ubat untuk menyelesaikan kejahiliahan masyarakat².

Allah SWT menurunkan al-Qur'^{ān} dengan pendekatannya yang khas untuk mengubati penyakit masyarakat masa itu. Al-Qur'^{ān} tidak mengajarkan mereka teori-teori sains dan teknologi secara terperinci untuk melengkapkan khazanah pengetahuan mereka, tetapi al-Qur'^{ān} mengajar mereka panduan hidup yang lebih asas dan lebih penting. Allah SWT menurunkan al-Qur'^{ān} dengan ajaran-ajarannya yang mulia untuk mengubati segala krisis dan permasalahan yang mereka hadapi.

Apa yang dialami masyarakat pra Islam terdahulu sama dengan apa yang dialami masyarakat moden hari ini. Mereka tidak memiliki panduan hidup yang akan mengarahkan mereka menuju kebahagiaan sejati. Maka masyarakat moden hari ini terutamanya yang menginginkan kebahagiaan sejati serta pedoman untuk menghindarkan diri daripada segala krisis moral dan penyakit sosial sangat menghajatkan suatu panduan yang akan memandu hidup mereka, al-Qur'^{ān} adalah panduan yang paling tepat bagi masyarakat moden hari ini, al-Qur'^{ān} dengan rumusan-rumusannya yang unik serta pendekatan dan kaedahnya yang khas akan menyelesaikan segala krisis dan penyakit sosial yang menimpa masyarakat moden.

² Prof. Ahmad Baiquni M.Sc.Ph.D (1994). *Al-Qur'an Ilmu Pengetahuan Dan Teknologi*. PT Dana Bhakti Wakaf Yogyakarta h.7

4.3 Pengertian Metod al-Qur'an.

Allah SWT telah menciptakan manusia dan memberikan amanah kepadanya sebagai khalifah di muka bumi. Salah satu tanda kasih sayang Allah SWT yang terbesar kepada manusia adalah Dia menurunkan *syariat* dan *manhāj* kepada manusia. *Syariat* adalah undang-undang Allah SWT yang mengatur kehidupan ummah manusia agar tercipta keamanan, kedamaian dan keadilan di muka bumi yang meliputi hubungan manusia dengan Allah SWT, manusia dengan manusia, dan manusia dengan seluruh makhluk. *Manhāj* pula adalah kaedah atau metod dalam melaksanakan *syariat* tersebut di dalam kehidupan nyata secara sistematik bersesuaian dengan tahap-tahapnya³.

Manhāj yang di dalam bahasa Melayu disebut metod atau kaedah adalah salah satu komponen penting yang menghubungkan tindakan dengan sesebuah tujuan, sebab adalah suatu yang mustahil bila sesuatu subjek dapat diterima dengan baik apabila tidak disampaikan dengan metod yang tepat. Metod dapat diibaratkan sebagai sebuah alat yang dapat digunakan dalam suatu proses pencapaian tujuan, alat itu hanya akan dapat bertindak efektif bila penggunaanya disesuaikan dengan fungsi dan kapasiti alat tersebut. Dalam pengertian yang sederhana metod dapat diartikan sebagai suatu cara untuk menyampaikan suatu nilai tertentu dari si pembawa pesan kepada si penerima pesan⁴.

Para Nabi dan Rasul silih berganti dengan membawa *syarī'at* dan *manhāj* yang akan membimbing ummah manusia menuju kehidupan ideal di bawah

³ 'Abd al-Karīm Maḥmūd (1985). *Al-Qur'ān Wa al-Nabiy*. Cet ke II Dārul Ma'ārif Qāhirah h.12

⁴ Drs.Syahidin M.Pd (1999). *Metode Pendidikan Qur'ani, Teori dan Aplikasi*. CV Misaka Galiza. Jakarta h.39

pancaran keredhaan Allah SWT. Di dalam al-Qur'an, kata *manhaj* hanya disebut sekali saja iaitu pada surah *al-Maidah*, ayat 48 :

وَأَنْزَلْنَا إِلَيْكَ الْكِتَابَ بِالْحَقِّ مُصَدِّقًا لِمَا بَيْنَ يَدَيْهِ مِنَ الْكِتَابِ وَمُهَيْمِنًا عَلَيْهِ
فَأَحْكُمْ بَيْنَهُمْ بِمَا أَنْزَلَ اللَّهُ وَلَا تَتَّبِعْ أَهْوَاءَهُمْ عَمَّا جَاءَكَ مِنَ الْحَقِّ لِكُلِّ جَعَلْنَا
مِنْكُمْ شِرْعَةً وَمِنْهَاجًا وَلَوْ شَاءَ اللَّهُ لَجَعَلَكُمْ أُمَّةً وَاحِدَةً وَلَكِنْ لِيَبْلُوَكُمْ فِي مَا
آتَاكُمْ فَاسْتَبِقُوا الْخَيْرَاتِ إِلَى اللَّهِ مَرْجِعُكُمْ جَمِيعًا فَيُنَبِّئُكُمْ بِمَا كُنْتُمْ فِيهِ
تَخْتَلِفُونَ (٤٨)

Ertinya : Dan kami turunkan al-Kitab (al-Qur'an) kepadamu dengan membawa kebenaran, yang membenarkan kitab-kitab suci terdahulu, sebagai penimbang atas kitab-kitab itu. Maka berilah hukum kepada mereka menurut hukum yang telah diturunkan Allah kepadamu. Janganlah kamu menuruti kemahuan mereka yang menyeleweng daripada kebenaran yang ada padamu. Tiap-tiap ummah telah kami jadikan padanya syariat dan manhaj. Jikalau Allah menghendaki, maka Dia dapat jadikan kamu suatu ummah saja, tetapi Dia mahu menguji kamu tentang apa yang telah diberikanNya.

Terjemahan Surah al-Maidah(5):48

4.3.1 Pengertian Manhāj Menurut Bahasa

Ibnu Manzhūr dalam *Lisān al-'Arab* menukilkan : *Manhāj* berasal dari pangkal kata “*nahjun*” yang diartikan sebagai *ṭāriq* (jalan); *bayyinun wādihun* (jelas terang benderang). Jama'nya “*nahjāun wa nujuhun wa nuhūjun*” sama ertinya “*wādihuhu*” (meneranginya). *Manhāj* dengan *minhāj* adalah sama ertinya jika dikatakan “*anhajuth-ṭāriq*”, maka ertinya *waḍaha wastabāna wa shara nahjan wāḍhan bayyinan* (dijelaskan, diterangi, diterangi dengan jelas). Dan *al-manhāj* / *al-minhāj* ertinya ‘*al-ṭarīqan al-wāḍihah* (jalan yang terang-benderang / kaedah yang jelas)⁵.

Demikian pula ahli-ahli bahasa lainnya mengertikan *manhāj* sebagai *ṭarīqan wāḍhan* (jalan yang terang). Di antara mereka adalah *Imām al-Rāzi* dalam *mukhtasar al-Sihhah*, *Fairuz Zabadi* dalam *al-Qāmūs al-Muhith*, *Ibnu Fāris* dalam *Mu'jam Muqāyisul Lughah*, *al-Jauhārī* dalam *al-Sihhah Tājul Lughah*, *Farīd Wajidī* dalam *Daurah Ma'ariful Qur'ān* dan lain-lainnya⁶. Sementara ‘*Abdul Fattah Hadhor* mengertikan *manhāj* sebagai seni penyusunan bernas (*saḥiḥ*) bagi merumuskan susunan pemikiran-pemikiran yang bijak⁷.

4.3.2 Pengertian Manhāj Menurut Mufasssīrīn

Umumnya para mufasssīrīn seperti *Ibnu 'Abbās*, *Ṭabarī*, *Qurṭubī*, *al-Qasyimī*, *al-Rāzī*, *Ibnu Katsīr*, *al-Naisburī*, *al-Alūsī*, *Imām Jalālain*, *Khāzin*, *al-Baghāwi*, *al-*

⁵ *Ibnu Manzhūr* tt. *Lisān al-'Arab*. Fashl al-nūn harf al-jīm. Juz II Beirut Dār al-Sadr h.383

⁶ *Imām al-Rāzi* (1981). *Mukhtasar al-Sihhah*. Beirut Dār al-Fikr h.681

⁷ ‘*Abd al-Fattāh Haḍar* (1981). ‘*Azāmat al-Baht al-Thomi fi al-'Alimul 'Arabi*. Riyadh Ma'had al-Idārah al-'Ammah h.12

Syaukāni, al-Nasafī, al-Qahidī, al-Qushairī, al-Baiḍāwī, al-Zamaksarī, al-Mudzkarī, Ibnu Abī Hayyān, Ṭanṭāwī Jauharī, al-Ṭaba'ṭabā'i, al-Sabzawārī, M. Jawwād al-Mughniyyah, al-Ṣabūnī, al-Marāghī, Muḥammad 'Abduh, Sayyid Qutb, Said Hawwa dan lainnya mengertikan manhāj sebagai *ṭariqan wāḍihan* (jalan yang terang benderang) atau sabīlan (jalan)⁸.

Al-Ṭabārī dan *Khāzin* menukulkan sebuah pendapat bahawa ianya *manhāj* satu makna dengan *syarī'at*, di mana *manhāj* berfungsi sebagai penguat (*taukīd*) dari kata *syarī'at* yang mendahuluinya⁹.

Al-Ṭabārī pula menyebutkan ada perbezaan diantara para *mufasssirin* tentang erti *likulli minkum* (pada tiap-tiap kamu). Ada yang mengertikan kamu (*kum*) dengan erti seluruh ummah manusia dari zaman dulu telahpun diturunkan kepada mereka *syarī'at* dan *manhāj*, namun ada yang mengertikannya sebagai ummah Nabi Muhammad Saw sahaja.¹⁰

Namun dalam hal ini, sebagaimana dikemukakan *Khāzin*, jika dilihat konteks ayatnya secara menyeluruh, maka jelaslah ayat tersebut membahas tentang ummah terdahulu dengan disebutkan kitab-kitab terdahulu mereka dan juga kalimah “dan jika sekiranya Allah SWT menghendaki, maka Dia dapat jadikan kamu satu ummah saja”. Maka yang lebih kuat adalah diertikan “*kum*” disini sebagai seluruh ummah manusia sebagaimana difahami *jumhūr mufasssirin*¹¹.

⁸ Helmy Bakar al-Mascaty (1995). *Op cit* h.60

⁹ Al-Alusī (1985). *Rūḥul Ma'āni*. Juz V Beirut Dār al-Ihya at-Turāth al-'Arabi. Ṭaba'ah al-Rābiyah h.153

¹⁰ Al-Ṭabārī tt. *Tafsīr Ṭabārī*. Juz X Misr Dār-al-Ma'ārif h.384

¹¹ Khāzin (1979). *Tafsīr al-Khāzin*. Juz II Beirut Dār al-Fikr h.61

Diantara para *mufassir*, pendapat yang dinukilkan *Khāzin* adalah berkaitan erat dengan pembahasan di sini, iaitu ketika beliau memberikan penjelasan lebih lanjut tentang perbezaan antara *syarīāt* dan *manhāj* dalam menyanggah mereka yang berpendapat *syarīāt* dan *manhāj* itu sama, beliau menulis :

“Dan telah berkata yang terakhir, di antara keduanya (*syarīāt* dan *manhāj*) berbeza jauh, iaitu sesungguhnya *syarīāt* adalah apa yang diperintahkan Allah SWT kepada hamba-hambaNya, sedangkan *manhāj* ialah jalan yang terang dalam merealisasikan *syarīāt* tersebut”¹². Demikian juga pendapat *al-Rāzī* dan *al-Marāghī*.

Menurut pendapat yang terakhir ini, jelaslah maksud perkataan pada ayat di atas menunjukkan pengertian *manhāj* (kaedah) dalam merealisasikan *syariat* ataupun *al-Kitāb*. Pengertian ini diperkuat pula dengan pendapat beberapa *mufassirin* yang disebutkan terdahulu yang mengertikan *manhāj* sebagai “*ṭarīqan wāḍḥan*” ataupun “*sabīlan*” yang dapat diertikan sebagai jalan terang-benderang dalam merealisasikan *syarīāt* ataupun KitabNya. Maka dengan demikian beberapa pendapat para *mufassirīn* ini dapat dihubungkan dan saling menguatkan, dengan kesimpulannya *manhāj* adalah *ṭarīq/sabīl* (jalan/cara/kaedah) dalam merealisasikan syariāt ataupun kitab Allah SWT.

Maka dengan demikian, pengertian *manhāj* menurut bahasa dan *mufassirīn* mengandungi maksud kaedah dalam merealisasikan sesuatu. Jika dikatakan *manhāj al-Qur’ān* maka mengandungi pengertian kaedah yang ditempuh dalam merealisasikan/menjelaskan al-Qur’ān, kerana al-Qur’ān mengandungi ajaran-ajaran yang sempurna, membicarakan seluruh aspek kehidupan ummah manusia

¹² Ibid h.61

dengan teori-teori suci yang dibawahnya secara global kepada ummah manusia, pastilah mutlak memerlukan pedoman nyata dalam pelaksanaannya.

4.4 Metodologi Al-Qur'ān Dalam Menangani Permasalahan Penyakit Sosial Dan Krisis Moral

Di antara metod-metod yang digunakan oleh al-Qur'ān untuk menegah dan mengubati penyakit sosial dan krisis moral adalah seperti berikut:

4.4.1 Metod Pendidikan (*Tarbiyah*)

Manusia dilahirkan ke dunia ini adalah dalam keadaan yang sangat lemah, tidak berupaya dan tidak mengetahui apa-apa, seperti mana termaktub dalam al-Qur'ān surah al-Nahl ayat 78 :

وَاللَّهُ أَخْرَجَكُمْ مِنْ بُطُونِ أُمَّهَاتِكُمْ لَا تَعْلَمُونَ شَيْئًا وَجَعَلَ لَكُمُ السَّمْعَ وَالْأَبْصَارَ
وَالْأَفْئِدَةَ لَعَلَّكُمْ تَشْكُرُونَ (٧٨)

Ertinya : Allah telah mengeluarkan kamu daripada perut ibumu, sedang kamu tiada mengetahui sesuatu apapun ; Dia adakan bagimu pendengaran, penglihatan dan hati, mudah-mudahan kamu berterima kasih kepadaNya.

Terjemahan surah al-Nahl(16):78

Menurut al-Qur'ān, manusia adalah makhluk ciptaan Allah SWT yang dibekali dengan akal dan hati. Kombinasi akal dan hati inilah yang membezakan manusia dari makhluk ciptaan Allah SWT yang lainnya.

Tujuan penciptaan manusia dijelaskan dalam al-Qur'an pada firman Allah SWT surah al-Zāriyāt ayat 56 :

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِي (٥٦)

Ertinya : Tiadalah Aku jadikan jin dan manusia, melainkan supaya mereka menyembah kepadaKu.

Terjemahan surah al- Zāriyāt (51):56

Untuk melaksanakan pengabdian atau ibadah kepada Allah SWT ini, manusia dibekali dengan potensi dapat dididik dan dapat pula mendidik orang lain.

Atas dasar potensi dapat dididik yang dimiliki oleh manusia ini, maka salah satu metod yang terpenting yang diguna pakai oleh al-Qur'an dalam menangani penyakit sosial dan krisis moral adalah metod pendidikan (*tarbiyah*).

Dalam metod pendidikan dan tarbiyah ini al-Qur'an menggunakan beberapa tahapan yang penting iaitu :

a. Tahap pertama.

Pada tahap pertama ini yang dilakukan oleh al-Qur'an adalah mendidik jiwa manusia, iaitu dengan memperkenalkan manusia dengan penciptanya dan mengembalikan jiwa manusia tersebut kepada fitrah semula jadinya yang suci, membersihkannya dari segala kekotoran dan kepercayaan karut marut. Asas fitrah semula jadi tersebut ialah tauhid (mengEsakan Allah SWT). Firman Allah SWT dalam surah al-A'raf ayat 172-173 :

وَإِذْ أَخَذَ رَبُّكَ مِنْ بَنِي آدَمَ مِنْ ظُهُورِهِمْ ذُرِّيَّتَهُمْ وَأَشْهَدَهُمْ عَلَىٰ أَنفُسِهِمْ أَلَسْتُ
 بِرَبِّكُمْ قَالُوا بَلَىٰ شَهِدْنَا أَنْ تَقُولُوا يَوْمَ الْقِيَامَةِ إِنَّا كُنَّا عَنْ هَذَا غَافِلِينَ (١٧٢) أَوْ
 تَقُولُوا إِنَّمَا أَشْرَكَ آبَاؤُنَا مِنْ قَبْلُ وَكُنَّا ذُرِّيَّةً مِنْ بَعْدِهِمْ أَفَتُهْلِكُنَا بِمَا فَعَلَ
 الْمُبْطِلُونَ (١٧٣)

Ertinya : Ketika Tuhanmu menjadikan keturunan anak Adam daripada tulang punggung mereka, Dia mempersaksikan dengan diri mereka sendiri. Allah berfirman : bukankan Aku Tuhan kamu ? sahutnya : ya, kami menjadi saksi, supaya kamu jangan mengatakan pada hari kiamat : sesungguhnya kami lengah terhadap perihal ini, atau kamu katakan : hanya bapa-bapa kami dahulu yang mempersekutukan, dan kami keturunan kemudian mereka. Adakah Engkau akan membinasakan kami kerana perbuatan orang-orang yang membuat bathil ?

Terjemahan Surah al-A'raf(7):172-173

Begitu juga firman Allah SWT dalam surah al-Anbiyā ayat 30 :

أَوَلَمْ يَرَى الَّذِينَ كَفَرُوا أَنَّ السَّمَاوَاتِ وَالْأَرْضَ كَانَتَا رَتْقًا فَفَتَقْنَاهُمَا وَجَعَلْنَا مِنَ
 الْمَاءِ كُلَّ شَيْءٍ حَيٍّ أَفَلَا يُؤْمِنُونَ (٣٠)

Ertinya : Tiadakah orang-orang kafir mengetahui bahawa beberapa langit dan bumi adalah keduanya bertaut (bersatu), lalu Kami belahkan keduanya ? Kami jadikan tiap-tiap sesuatu yang hidup dari air. Tiadakah mereka percaya ?

Terjemahan surah al-Anbiyā (21):30

Kepercayaan kepada Allah SWT merupakan suatu sumber kekuatan yang paling besar bagi seorang mukmin, yang menghubungkannya dengan kekuatan Allah SWT yang tiada tandingannya. Al-Qur'an bukan hanya sekadar memperkenalkan manusia dengan penciptanya, tetapi juga mendedahkan segala sifat-sifat dan kuasa Allah SWT¹³, seperti mana termaktub dalam firmanNya surah al-Ahzāb ayat 51 :

وَاللَّهُ يَعْلَمُ مَا فِي قُلُوبِكُمْ وَكَانَ اللَّهُ عَلِيمًا حَلِيمًا (٥١)

Ertinya : Allah mengetahui apa-apa yang ada dalam hatimu. Allah maha mengetahui lagi penyantun.

Terjemahan Surah al-Ahzāb(33):51

Begitu juga firman Allah SWT dalam surah al-An'am ayat 3 :

وَهُوَ اللَّهُ فِي السَّمَاوَاتِ وَفِي الْأَرْضِ يَعْلَمُ سِرُّكُمْ وَجَهْرَكُمْ وَيَعْلَمُ مَا تَكْسِبُونَ

Ertinya : Dialah Allah di langit dan di bumi. Dia mengetahui yang kamu rahasiakan dan yang kamu lahirkan dan mengetahui apa-apa yang kamu usahakan.

Terjemahan Surah al-An'am(6):3

FirmanNya lagi dalam surah Yūnus ayat 61 :

وَمَا يَعْزُبُ عَنْ رَبِّكَ مِنْ مِثْقَالِ ذَرَّةٍ فِي الْأَرْضِ وَلَا فِي السَّمَاءِ وَلَا أَصْغَرَ مِنْ

ذَلِكَ وَلَا أَكْبَرَ إِلَّا فِي كِتَابٍ مُبِينٍ (٦١)

Ertinya : Tiada lenyap dari Tuhanmu seberat zarrah di bumi dan di langit dan tiada pula yang terlebih kecil daripada itu dan tiada pula yang terbesar, melainkan semuanya dalam kitab yang terang.

¹³ Muhammad Shadid (1994). *Metodologi al-Qur'an Dalam Pendidikan*. (Terj). Osman Hj. Khalid. Bahagian Hal Ehwal Islam Jab. PM h. 50

Terjemahan Surah Yūnus (10):61

Di dalam beberapa ayat lain juga dijelaskan tentang kedekatan Allah SWT dengan makhlukNya antaranya dalam Surah al-Hadīd ayat 4 :

وَهُوَ مَعَكُمْ أَيْنَ مَا كُنْتُمْ وَاللَّهُ بِمَا تَعْمَلُونَ بَصِيرٌ (٤)

Ertinya : Dia beserta kamu, di mana kamu berada (mengetahui halmu), Allah maha melihat apa-apa yang kamu kerjakan.

Terjemahan Surah al-Hadīd(57):4

Dan dalam surah Qāf ayat 16 :

وَنَحْنُ أَقْرَبُ إِلَيْهِ مِنْ حَبْلِ الْوَرِيدِ (١٦)

Ertinya : Dan Kami lebih hampir kepadanya dari urat lehernya.

Terjemahan Surah Qāf(50):16

Dengan memperkenalkan manusia kepada Penciptanya dan mendedahkan segala sifat-sifat dan kuasa Allah SWT al-Qur'an mendidik jiwa manusia agar sentiasa beringat dalam setiap apa yang diperbuatnya, kerana mereka yakin setiap apa yang mereka lakukan tidak akan luput daripada pemerhatian Allah SWT. Apabila rasa ini sudah tertanam dalam hati setiap manusia maka ia akan selalu berusaha untuk menghindarkan dirinya dari segala perbuatan yang dilarang oleh Allah SWT. Dan selalu berusaha untuk membersihkan dirinya dari segala kekotoran-kekotoran zahir dan batin¹⁴.

¹⁴ Dr. Abdurrahman Umdirah (1995). *Membentuk Insan Kamil, Motivasi Pendidikan Islam*. Alih bahasa Hj. Abdul Hadi Basultanah MA. Darul Nu'man Kuala Lumpur. h.67

b. Tahap Kedua.

Setelah jiwa manusia dididik untuk mengenal dan mentauhidkan Allah SWT, kemudian manusia didedahkan dengan segala sifat-sifat kesempurnaan dan kuasa Allah SWT, maka kemudiannya pada tahap kedua di dalam metod pendidikan (tarbiyah) yang diguna pakai al-Qur'an dalam menangani penyakit sosial dan krisis moral ialah al-Qur'an mendidik manusia melalui ibadah-ibadah.

Semua ibadah-ibadah yang diperintahkan oleh Allah SWT ini adalah bertujuan untuk semakin memantapkan akidah manusia dan memagari dirinya dari perbuatan-perbuatan yang dilarang dalam ajaran Islam. Ibadah yang paling berkesan untuk membendung segala bentuk kemungkaran seperti krisis moral dan penyakit sosial yang tengah bermaharajalela pada saat ini adalah ibadah solat. Hal ini termaktub di dalam al-Qur'an dalam surah al-Ankabūt ayat 45 :

أَثَلُ مَا أُوحِيَ إِلَيْكَ مِنَ الْكِتَابِ وَأَقِمِ الصَّلَاةَ إِنَّ الصَّلَاةَ تَنْهَىٰ عَنِ الْفَحْشَاءِ
وَالْمُنْكَرِ وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ (٤٥)

Ertinya : Bacakanlah (Ya Muhammad) apa-apa yang diwahyukan kepadamu diantara kitab, dan dirikanlah sembahyang. Sesungguhnya sembahyang itu melarang memperbuat yang keji dan yang mungkar. Sesungguhnya mengingat Allah terlebih besar (faedahnyanya). Allah Maha mengetahui apa-apa yang kamu usahakan.

Terjemahan Surah al-Ankabūt(29):45

Solat adalah penghubung antara hamba dengan Penciptanya. Apabila solat dilaksanakan dengan betul dan khusu', maka ianya akan memberi kesan kepada

perilaku dan kehidupan pelakunya¹⁵. Pengertian ibadah dalam al-Qur'an adalah meluas tidak sekadar terbatas kepada perkara-perkara yang difardukan semata. Menurut al-Qur'an kehidupan ini adalah satu kesatuan, setiap yang ada di dalamnya adalah untuk Allah SWT. Tidak ada pemisahan diantara jalan dunia dan jalan akhirat dan tidak ada pemisahan antara perkara-perkara yang difardukan dengan tata susila. Setiap gerakan yang dilakukan oleh seorang muslim dalam kehidupannya mempunyai kaitan yang rapat dengan akidahnya dan ditujukan kepada tuhanNya dengan melaksanakan segala suruhanNya serta merealisasikan risalah-risalahNya¹⁶. Firman Allah SWT dalam surah al-An'am ayat 162 :

قُلْ إِنَّ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ الْعَالَمِينَ (١٦٢)

Ertinya : Katakanlah : Sesungguhnya sembahyangku, ibadahku, hidupku dan matiku, semuanya bagi Allah, Tuhan semesta alam.

Terjemahan Surah al-An'am(6):162

Semua ibadah yang difardukan adalah bertujuan untuk mengubati kelemahan manusia dan juga membebaskan diri mereka dari dikongkong oleh hawa nafsu. Selain daripada itu ia juga membersihkan sumber-sumber dosa serta menutup lubang-lubang yang ditembusi oleh syaitan.

Ibadah-ibadah ini bukan hanya terhadap ibadah solat sahaja, akan tetapi ianya mencakupi semua amalan-amalan yang mempunyai tujuan yang ikhlas untuk menyembah dan mengabdikan kepada Allah SWT. Kesemua ibadah-ibadah ini

¹⁵ Zajjā, Abi Ishāq Ibrāhīm ibn al-Sariy(1997).*Ma'āni al-Qur'ān wa I'rābuhu*.Syarh wa taḥqīq Dr.'Abd al-Jalīl Abduh Syibli. Tabā'ah al-thaniyah.Juz 4.Qāhirah: Dar al-Hadith. h.168

¹⁶Muhammad Shadik (1994).*Op.Cit* h.187

mempunyai nilai-nilai tarbiyah untuk mendidik jiwa manusia agar sentiasa tunduk dan patuh pada Allah SWT.

Seperti ibadah puasa, ibadah ini merupakan suatu pendidikan dalam menguatkan kemahuan serta melatihnya untuk menghadapi serta menguasai hawa nafsu. Ibadah puasa bukannya menghapuskan hawa nafsu dengan melemahkan jasmani, akan tetapi ianya didikan untuk hati kecil, ini kerana tiada sesiapa yang mengawas seseorang yang puasa selain daripada Allah SWT. Justeru itu seseorang yang berpuasa akan terlatih dengan sifat amanah dalam setiap urusan di dalam kehidupannya. Ia juga merasakan bahawa dia sentiasa diawasi oleh Allah SWT dalam setiap tingkah lakunya. Apabila rasa "diawasi" ini sudah melekat pada jiwa seorang muslim maka ia akan bersikap hati-hati dalam setiap tindak-tanduknya.

Begitu juga dengan kesan ibadah zakat dalam pendidikan jiwa manusia, ia adalah amat berkesan. Kerana cinta terhadap harta kekayaan, ingin mendapatkannya dengan menghalalkan segala cara, kedekut dengannya serta mengutamakan diri sendiri adalah merupakan antara fenomena yang paling ketara menunjukkan krisis moral yang dialami masyarakat moden hari ini yang menunjukkan kelemahan mereka. Malah ianya merupakan punca yang memusnahkan jiwa serta mencetuskan permusuhan, saling dengki dengki serta membawa kepada perpecahan dalam masyarakat, seterusnya melahirkan keburukan dan penderitaan.

Ibadah zakat akan mengubati kelemahan jiwa ini serta membersihkannya daripada penyakit bakhil, mementingkan diri serta memuja harta kekayaan. Selain daripada itu, zakat juga menghapuskan permusuhan, hasad dengki, dan rasa hina

dan kekurangan dalam masyarakat. Kerana zakat akan memberikan hak-hak orang miskin yang terdapat dalam harta si kaya.

Begitulah pada hakikatnya bahawa semua ibadah-ibadah yang difardukan bertujuan untuk mendidik jiwa manusia agar sentiasa tunduk dan patuh pada Allah SWT.

c. Tahap ketiga.

Setelah al-Qur'an mendidik jiwa manusia untuk mengenal Penciptanya dan mendedehkannya kepada segala sifat dan kuasa Allah SWT dan kemudiannya al-Qur'an mendidik manusia dengan perantara ibadah-ibadah yang difardukan, tahap ketiga yang dilakukan al-Qur'an dalam mendidik jiwa manusia untuk sentiasa tunduk dan patuh pada Allah SWT adalah mengajak manusia untuk berfikir tentang kehidupan akhirat dan hari pembalasan.

Al-Qur'an memberi perhatian khusus terhadap bukti-bukti kiamat, hari berbangkit, hisab, pahal dan siksaan. Alam akhirat yang dijanjikan bakal datang sesudah alam sekarang ini. Di dalam al-Qur'an hari kiamat tidak hanya diberi ciri-ciri bahkan dilukiskan secara kongkrit, hidup dan seakan nyata. Apabila orang Islam melihat gambaran yang diberi serta bukti-bukti yang dipaparkan akan terpengaruh hatinya dan bergetar, jiwa mereka akan bergoncang¹⁷.

Gambaran tentang keadaan hari kiamat dan hari pembalasan amatlah banyak dijelaskan dalam al-Qur'an, antaranya Surah al-Zalzalah ayat 1-8 :

¹⁷ Sayid Qutub (1996). *Kebenaran al-Qur'an Tentang Kehidupan Akhirat*. (Terj). Hj. Abdul Aziz. Thinker's Library Sdn. Bhd. h.28

إِذَا زُلْزِلَتِ الْأَرْضُ زِلْزَالَهَا (۱) وَأُخْرِجَتِ الْأَرْضُ أَنْقَالَهَا (۲) وَقَالَ الْإِنْسَانُ مَا لَهَا (۳)

(۳) يَوْمَئِذٍ تُحَدِّثُ أَخْبَارَهَا (۴) بِأَنَّ رَبَّكَ أَوْحَى لَهَا (۵) يَوْمَئِذٍ يَصْدُرُ النَّاسُ أَشْتَاتًا

لِيُرَوْا أَعْمَالَهُمْ (۶) فَمَنْ يَعْمَلْ مِثْقَالَ ذَرَّةٍ خَيْرًا يَرَهُ (۷) وَمَنْ يَعْمَلْ مِثْقَالَ ذَرَّةٍ شَرًّا

يَرَهُ (۸)

Ertinya : Apabila bumi bergoncang segoncang-goncangnya, dan bumi mengeluarkan segala kandungannya, dan berkatalah manusia ; mengapa ia (bumi ini) ?. Pada hari itu bumi memberitakan perkabarnya, bahawa sesungguhnya Tuhanmu telah mewahyukan (memerintahkannya) kepadanya. Pada hari itu manusia keluar (dari dalam kuburnya) bercerai berai supaya mereka melihat amal perbuatannya. Barang siapa yang mengerjakan kebaikan, meskipun seberat zarrah, akan dilihatnya (balasan) kebaikan itu. Barang siapa mengerjakan kejahatan, meskipun seberat zarrah akan dilihatnya (balasan) kejahatan itu.

Terjemahan Surah al-Zalzalah(99):1-8

Begitu juga dalam Surah al-Wāqī'ah ayat 1-6 :

إِذَا وَقَعَتِ الْوَاقِعَةُ (۱) لَيْسَ لَوْقَعَتِهَا كَاذِبَةٌ (۲) خَافِضَةٌ رَافِعَةٌ (۳) إِذَا رُجَّتِ الْأَرْضُ

رَحًا (۴) وَيُبْسَتِ الْجِبَالُ بَسًّا (۵) فَكَانَتْ هَبَاءً مُتَّبِنًا (۶)

Ertinya : Apabila peristiwa (kiamat) telah terjadi. Maka tiada seorang yang mendustakan kejadiannya. (ketika itu) ada orang yang rendah (hina, kafir) dan ada pula orang yang tinggi (mulia, mukmin). Apabila bergoyang bumi segoyang-goyangnya, dan hancur gunung-gunung sehancur-hancurnya sehingga ia menjadi debu yang berterbangan.

Terjemahan Surah al-Wāqī'ah(56):1-6

Dan dalam Surah al-Zumar ayat 70 :

وَوُفِّيَتْ كُلُّ نَفْسٍ مَّا عَمِلَتْ وَهُوَ أَعْلَمُ بِمَا يَفْعَلُونَ (٧٠)

Ertinya : Tiap-tiap orang disempurnakan (balasan) amalannya masing-masing, sedang Dia lebih mengetahui apa-apa yang mereka buat.

Terjemahan Surah al-Zumar(39):70

Ayat-ayat tersebut mengajak manusia untuk berfikir dan merenung serta menambah keyakinan mereka bahawa hari kiamat dan kehidupan akhirat adalah benar-benar wujud, dan setiap manusia akan mempertanggung jawabkan segala apa yang telah mereka lakukan pada kehidupan dunia tanpa ada yang boleh disembunyikan¹⁸.

4.4.2 Metod Penceritaan (*Kisah Qur'ani*)

Al-Qur'an merupakan sumber ajaran Islam, di dalamnya mengandungi berbagai-bagai petunjuk untuk manusia yang disaji dalam pelbagai bentuk, di antaranya melalui bentuk kisah (cerita). Semua kandungan al-Qur'an merupakan petunjuk untuk dijadikan pedoman manusia dalam menjalani kehidupannya agar mencapai matlamat sebenar iaitu kebahagiaan di dunia dan akhirat

Penyampaian ajaran Islam melalui bentuk penceritaan atau kisah amatlah banyak. Al-Qur'an menegaskan bahawa kisah-kisah itu boleh memberi

¹⁸ Ṣādiq ibn Ḥasan ibn 'Alī al-Bukhārī al-Qunūjīy(1965).*Fath al-Bayān fi Maqāsid al-Qur'ān*. Juz 9. Qāhīrah:Matba'ah al-'Āsimah. H.250

pengajaran kepada orang yang berfikir. Firman Allah SWT di dalam surah *Yūsuf* ayat 111 :

لَقَدْ كَانَ فِي قَصَصِهِمْ عِبْرَةٌ لِأُولِي الْأَلْبَابِ (١١١)

Ertinya : Sesungguhnya pada kisah-kisah mereka (Para Nabi) terdapat pengajaran dan iktibar bagi orang-orang yang berakal (berfikir).

Terjemahan Surah *Yūsuf*(12):111

Penceritaan atau kisah ini adalah merupakan salah satu metod al-Qur'an untuk menegahkan berlakunya penyakit sosial dan krisis moral dalam masyarakat. Sebagai individu manusia merupakan kesatuan antara jiwa dan raga. Di dalam jiwa manusia terdapat pembawaan-pembawaan yang dapat terpengaruh, sama ada kata-kata yang tertulis atau terdengar yang akan membawanya ke arah yang benar atau yang salah. Kata-kata tersebut dapat membuka jalan ke dalam jiwa secara langsung melalui pikiran dan perasaan, sehingga membuat pikiran dan perasaan goyah, dan sampai pada perenungan secara mendalam (*tafakkur*) serta penghayatan yang melahirkan perbuatan-perbuatan yang dilakukan secara sedar¹⁹.

Dengan metod penceritaan atau kisah dalam al-Qur'an maka manusia dengan sarana yang ada padanya iaitu pendengaran, penglihatan dan hati akan mengambil pelajaran (*'ibrah*) daripada peristiwa-peristiwa atau pengalaman-pengalaman yang diceritakan di dalam al-Qur'an. Firman Allah SWT di dalam surah *al-Nahl* ayat 78 :

¹⁹ Drs. Syahidin M.Pd. (1999) *Op.Cit* h.99

وَاللَّهُ أَخْرَجَكُمْ مِنْ بُطُونِ أُمَّهَاتِكُمْ لَا تَعْلَمُونَ شَيْئًا وَجَعَلَ لَكُمُ السَّمْعَ وَالْأَبْصَارَ

وَالْأَفْئِدَةَ لَعَلَّكُمْ تَشْكُرُونَ (٧٨)

Ertinya : Allah SWT telah mengeluarkan kamu dari perut ibumu, sedang kamu tiada mengetahui suatu apapun ; Dia adakan bagimu pendengaran, penglihatan dan hati, mudah-mudahan kamu berterima kasih kepadaNya.

Terjemahan Surah al-Nahl(16):78

Dalam mempengaruhi jiwa manusia untuk menjauhi perbuatan-perbuatan yang mengarah kepada gejala penyakit sosial dan krisis moral, ajaran Islam sentiasa menyesuaikan dengan potensi yang ada pada diri manusia tersebut. Salah satu ajaran atau cara al-Qur'an yang berkenaan dengan cara mempengaruhi jiwa adalah dengan mengambil pelajaran dari peristiwa-peristiwa atau pengalaman-pengalaman orang lain yang disebut 'ibrah sehingga manusia tidak tergamak untuk melakukan perbuatan-perbuatan buruk seperti yang dikisahkan di dalam al-Qur'an firman Allah SWT di dalam surah *al-Hasyr* ayat 2 :

فَاعْتَبِرُوا يَا أُولِي الْأَبْصَارِ (٢)

Ertinya : Maka ambillah 'ibrah (pengajaran), hai orang-orang yang mempunyai pemandangan.

Terjemahan Surah al-Hasyr(59):2

Ayat ini mengingatkan manusia agar sentiasa mengambil 'ibrah dengan jalan beriktibar, sama ada dari kisah, fenomena alam dan peristiwa sejarah jiwa

manusia akan dibawa pada situasi yang khas di dalam perasaan, yaitu kegoyahan dan terpengaruhnya perasaan²⁰.

Kata *'ibrah* berasal dari akar kata "*'abara*", *'abara arra'yu* bererti menafsirkan mimpi dan mengetahui apa yang akan terjadi pada yang bermimpi, sedangkan *'abara al-wadiya* atau *'abara al-nahr* bererti menyeberangi sungai dari satu tepi ke tepi yang lain yang berlawanan. *'Al-ibr* juga bererti melampaui dari suatu keadaan kepada keadaan yang lain. Kata *'ibrah* juga bererti *'al-ujbu* iaitu kekaguman²¹.

Pengertian *'ibrah* di dalam al-Qur'an dapat diertikan sebagai suatu usaha untuk mengambil pelajaran daripada pengalaman-pengalaman orang lain atau daripada masa lampau melalui suatu proses berfikir secara mendalam, sehingga menimbulkan kesedaran pada diri seseorang. Daripada kesedaran itu akan timbul keinginan untuk menjauhi perbuatan yang buruk dan meneladani atau mencontohi perbuatan yang baik²².

4.4.2.1 Tujuan Kisah Qur'ani

Kisah di dalam al-Qur'an dapat menggugah hati para pembacanya. Kisah Qur'ani bukanlah karya seni, melainkan firman Allah SWT yang mempunyai nilai-nilai estetika yang sangat tinggi, jauh di atas segala bentuk karya seni yang lainnya. Di dalamnya memuat sejumlah informasi penting tentang kehidupan dan peristiwa-peristiwa yang terjadi pada manusia terdahulu dengan tujuan untuk dijadikan

²⁰ Şadiq ibn Hasan ibn 'Aly(1965) *op cit* h.342

²¹ Ibn Manẓūr Jamāl al-Dīn Muḥammad tt. *Lisān al-Arab*. Fashl al-Zha' wa al-'ain harf al-ra. Ibn Mukarram al-Ansary. Dar al-Misriyyah Li al-Ta'lif wa al-Tarjamah. Juz 6 h.203.

²² Şadiq ibn Hasan ibn 'Aly(1965) *op cit* h.343

cermin dan pelajaran bagi kehidupan manusia di masa itu dan di masa hadapan, sehingga al-Qur'an menjadi penegah terjadinya kemusnahan dan keburukan di masa lampau, apabila kisah-kisah yang diceritakannya dijadikan pegangan. Inilah salah satu metod yang digunakan oleh al-Qur'an untuk menegah terjadinya gejala sosial dan krisis moral sepanjang zaman.

Adapun tujuana lain yang lebih 'ām dan menyeluruh dari kisah Qur'ani ini adalah seperti berikut :

1. Untuk memberikan argumentasi yang kuat kepada manusia bahawa al-Qur'an bukanlah karya manusia, tapi ianya merupakan firman Allah SWT yang diwahyukan kepada Nabi Muhammad Saw.
2. Untuk meluruskan informasi yang salah tentang peristiwa-peristiwa yang sebenar yang terjadi di zaman dahulu, yang dipahami secara keliru, khususnya oleh orang-orang yahudi dan nasrani sejak masa Nabi hingga ke hari ini.
3. Untuk memberikan bukti kerasulan Muhammad Saw yang sudah dipersiapkan Allah SWT jauh sebelumnya seperti mana yang dinyatakan oleh Nabi Isa a.s firman Allah SWT dalam surah *al-Shafayat* 6 :

وَإِذْ قَالَ عِيسَى ابْنُ مَرْيَمَ يَا بَنِي إِسْرَائِيلَ إِنِّي رَسُولُ اللَّهِ إِلَيْكُمْ مُصَدِّقًا لِمَا بَيْنَ

يَدَيْهِ مِنَ التَّوْرَةِ وَمُبَشِّرًا بِرَسُولٍ يَأْتِيهِ مِنْ بَعْدِي اسْمُهُ أَحْمَدُ فَلَمَّا جَاءَهُمْ

بِالْبَيِّنَاتِ قَالُوا هَذَا سِحْرٌ مُّبِينٌ (٦)

Ertinya : Ingatlah, ketika 'Isa anak Maryam berkata : Hai Bani Israil, sesungguhnya aku rasul Allah kepadamu, serta membenarkan apa yang sebelumku, yaitu Taurat dan memberi kabar gembira dengan seorang rasul yang akan datang kemudiandku, namanya Ahmad (Muhammad). Maka tatkala rasul

itu datang kepada mereka dengan (membawa) keterangan, mereka berkata : ini sihir yang nyata.

Terjemahan Surah al-Sāf(61):6

4. Memberikan argumentasi yang benar dan rasional tentang konsep keTuhanan seperti dalam kisah Nabi Ibrahim a.s.
5. Menjelaskan bahawa secara keseluruhan ajaran yang dibawa oleh para Rasul sebelum Nabi Muhammad Saw adalah ajaran Islam, dan menjelaskan bahawa umat Islam itu adalah merupakan umat yang satu.
6. Untuk memberi motivasi kepada para penyebar dan pembela risalah Allah SWT dengan menjelaskan bahawa yang hak itu selalu menang kerana Allah SWT selalu melindungi para pembawa risalahNya.
7. Untuk memberi peringatan kepada manusia akan adanya bahaya penyesatan oleh syaitan dan memperlihatkan adanya permusuhan yang abadi di antara manusia dengan syaitan sejak dari Nabi Adam a.s lagi.
8. Memberikan informasi tentang akhirat dan pelbagai peristiwa-peristiwa yang pasti akan terjadi terhadap diri manusia sesuai dengan amal perbuatannya masing-masing dengan informasi ini diharapkan akan timbul rasa takut kepada Allah SWT²³.

Di dalam al-Qur'an diungkapkan beberapa kisah yang menarik yang menggambarkan kepribadian seseorang, cara hidup Nabi-nabi, orang-orang soleh seperti *Luqmān*, *Ashābul-kahfi*, *Zulqurnain*, pada kisah Nabi pula dapat kita perhatikan cerita Nabi Nuh a.s dengan kaumnya yang degil yang akhirnya ditenggelamkan semuanya. Kisah kaum Nabi Lut a.s yang melampau batas

²³ Drs.Syahidin M.Pd.(1999) *Op. Cit* h.86

akhirnya diterbalikkan negeri mereka²⁴. Dikisahkan di dalam al-Qur'an surah *al-Ankabū* ayat 28-29 :

وَلَوْطًا إِذْ قَالَ لِقَوْمِهِ إِنَّكُمْ لَتَأْتُونَ الْفَاحِشَةَ مَا سَبَقَكُمْ بِهَا مِنْ أَحَدٍ مِنَ الْعَالَمِينَ

(٢٨)

أَنْتُمْ لَتَأْتُونَ الرَّجَالَ وَتَقْطَعُونَ السَّبِيلَ وَتَأْتُونَ فِي نَادِيَكُمُ الْمُنْكَرَ فَمَا كَانَ

جَوَابَ قَوْمِهِ إِلَّا أَنْ قَالُوا إِنَّنَا بَعْدَابِ اللَّهِ إِنْ كُنْتَ مِنَ الصَّادِقِينَ(٢٩)

Ertinya : *Ingatlah akan Luth, ketika ia berkata kepada kaumnya: Sesungguhnya kamu memperbuat sesuatu yang keji, tidak seorangpun memperbuatnya sebelum kamu di antara orang-orang dalam alam. (28) Adakah kamu bersetubuh dengan laki-laki dan menyamun ditengah jalan serta kamu perbuat barang yang mungkar di tempat perhimpunanmu ? maka tidak adalah jawaban kaumnya, kecuali mereka berkata : datangkanlah siksa Allah itu kepada kami, jika engkau orang yang benar (29).*

Terjemahan Surah al-Ankabūt(29):28-29

Firman Allah SWT dalam surah *al-Anbiyā* ayat 74-75 :

وَلَوْطًا آتَيْنَاهُ حُكْمًا وَعِلْمًا وَنَجَّيْنَاهُ مِنَ الْقَرْيَةِ الَّتِي كَانَتْ تَعْمَلُ الْخَبَائِثَ إِنَّهُمْ

كَانُوا قَوْمٌ سَوْءٌ فَاسِقِينَ(٧٤) وَأَدْخَلْنَاهُ فِي رَحْمَتِنَا إِنَّهُ مِنَ الصَّالِحِينَ(٧٥)

Ertinya : *Telah kami berikan kepada Luth hukum-hukum (peraturan) dan ilmu pengetahuan, dan Kami lepaskan dia dari negeri yang penduduknya memperbuat seburuk-buruk kejahatan. Sesungguhnya mereka itu kaum jahat lagi pasik.(74) Dan kami*

²⁴ Al-Zajjāj(1997) *op cit* h.168

masukkan dia kedalam rahmat Kami. Sesungguhnya dia seorang yang salih (75).

Terjemahan Surah al-Anbiya(21):74-75

Firman Allah SWT di dalam surah *al-Syu'arā* ayat 165 - 175 :

أَتَأْتُونَ الذُّكْرَانَ مِنَ الْعَالَمِينَ (١٦٥) وَتَذَرُونَ مَا خَلَقَ لَكُمْ رَبُّكُمْ مِنْ أَزْوَاجِكُمْ

بَلْ أَنْتُمْ قَوْمٌ عَادُونَ (١٦٦) قَالُوا لَئِنْ لَمْ تَنْتَهِ يَا لُوطُ لَتَكُونَنَّ مِنَ الْمُخْرَجِينَ (١٦٧)

قَالَ إِنِّي لِعَمَلِكُمْ مِنَ الْقَالِينَ (١٦٨) رَبِّ نَجِّنِي وَأَهْلِي مِمَّا يَعْمَلُونَ (١٦٩)

فَتَجِدْنَاهُ وَأَهْلَهُ أَحْمَعِينَ (١٧٠) إِلَّا عَجُوزًا فِي الْغَابِرِينَ (١٧١) ثُمَّ دَمَرْنَا الْآخِرِينَ

(١٧٢) وَأَمْطَرْنَا عَلَيْهِمْ مَطَرًا فَسَاءَ مَطَرُ الْمُنْذَرِينَ (١٧٣) إِنَّ فِي ذَلِكَ لَآيَةً وَمَا

كَانَ أَكْثَرَهُمْ مُؤْمِنِينَ (١٧٤) وَإِنَّ رَبَّكَ لَهُوَ الْعَزِيزُ الرَّحِيمُ (١٧٥)

Ertinya : Patutkah kamu melakukan hubungan jenis dari kalangan manusia dan kamu tinggalkan apa yang diciptakan oleh Tuhan kamu untuk kamu (melakukan hubungan yang halal) dari badan isteri-isteri kamu? (kamu orang-orang yang bersalah) bahkan kamu adalah kaum yang melampaui batas (keinginan kebanyakan hewan). Mereka menjawab : "Sesungguhnya jika engkau tidak berhenti wahai Luth (daripada mencaci dan menyalahkan kami), niscaya engkau akan diusir keluar !" Nabi Luth berkata : "Sesungguhnya aku dari orang yang bencikan perbuatan kamu yang keji itu". (Nabi Luth berdo'a) : "Wahai Tuhanku, selamatkanlah daku dan keluarga serta pengikut-pengikutku dari apa yang dilakukan oleh golongan (jahat) itu". Maka kami selamatkan dia dan keluarganya serta pengikut-pengikutnya semua kecuali seorang perempuan tua tertinggal dalam golongan yang

kena azab itu. Kemudian Kami hancurkan yang lain (yang menentang Nabi Luth). Dan Kami hujani mereka dengan hujan (azab yang membinasakan), maka amatlah buruknya hujan azab yang menimpa kaum yang memberi amaran. Sesungguhnya peristiwa yang demikian, mengandungi satu tanda (yang membuktikan kekuasaan Allah), dan dalam pada itu, kebanyakan mereka tidak juga mahu beriman. Dan sesungguhnya Tuhanmu (wahai Muhammad), dia lah sahaja yang maha kuasa lagi maha mengasihani.

Terjemahan Surah al-Syu'arā(26):165-175

Begitu juga dengan kaum Bani Israil yang tidak setuju dan ingkar dengan pengangkatan *Talut* sebagai ketua dan pemerintah, kerana pada mereka dia seorang yang tidak kaya dan berbagai-bagai lagi alasan²⁵.

Di dalam Al-Qur'an juga diceritakan kisah orang yang bersifat sombong dan balasannya²⁶. Sifat sombong inilah yang banyak diamalkan oleh masyarakat moden pada hari ini. Dengan metod penceritaan ini al-Qur'an berusaha untuk membendung gejala sifat ini yang sudah mewabak dalam masyarakat dan sudah menjurus kepada krisis moral. Sifat sombong serta balasannya ini dikisahkan di dalam al-Qur'an dalam surah *al-Qashash* ayat 76 – 82 yang menceritakan kesombongan *Qārūn* dan balasan yang diterimanya, firman Allah SWT :

إِنَّ قَارُونَ كَانَ مِنْ قَوْمِ مُوسَى فَبَغَى عَلَيْهِمْ وَآتَيْنَاهُ مِنَ الْكُنُوزِ مَا إِنَّ مَفَاتِحَهُ

لَتَشْتَوِي بِالْعُصْبَةِ أُولِي الْقُوَّةِ إِذْ قَالَ لَهُ قَوْمُهُ لَا تَفْرَحْ إِنَّ اللَّهَ لَا يُحِبُّ الْفَرِحِينَ (٧٦)

²⁵ Muhammad Yusuf Ahmad (2000). *Sejarah dan Kaedah Pendidikan al-Qur'an*. Penerbit UM Kuala Lumpur h.86

²⁶ Sadiq ibn Hasan ibn 'Aly (1965) *op cit* juz 7 h.173

Ertinya : Sesungguhnya Qārūn adalah ia dari kamu Nabi Musa, kemudian ia berlaku sombong dan zalim terhadap mereka, dan Kami telah mengurniaknya dari berbagai jenis kekayaan yang anak-anak kuncinya menjadi beban yang sungguh berat untuk dipikul oleh sebilangan orang yang kuat sasa. (Ia berlaku sombong) ketika kaumnya berkata kepadanya : "janganlah engkau bermegah-megah (dengan kekayaanmu), sesungguhnya Allah tidak suka kepada orang yang bermegah-megah. (Seperti lagakmu itu).

Terjemahan Surah al-Qashash(28):76

وَاتَّبِعْ فِيمَا آتَاكَ اللَّهُ الدَّارَ الْآخِرَةَ وَلَا تَنْسَ نَصِيبَكَ مِنَ الدُّنْيَا وَأَحْسِنَ كَمَا
أَحْسَنَ اللَّهُ إِلَيْكَ وَلَا تَبْغِ الْفَسَادَ فِي الْأَرْضِ إِنَّ اللَّهَ لَا يُحِبُّ الْمُفْسِدِينَ(٧٧)

Ertinya : "Dan tuntutan dengan harta kekayaan yang telah dikurniakan Allah kepadamu akan pahala dan kebahagiaan hari akhirat dan janganlah engkau melupakan bahagianmu (keperluan dan bekalamu) dari dunia, dan berbuat baiklah (kepada hamba-hamba Allah) sebagaimana Allah berbuat baik kepadamu (dengan pemberian nikmatNya yang melimpah-limpah), dan janganlah engkau melakukan kerosakan di muka bumi, sesungguhnya Allah tidak suka kepada orang yang berbuat kerosakan".

Terjemahan Surah al-Qashash(28):77

قَالَ إِنَّمَا أُوتِيتُهُ عَلَىٰ عِلْمٍ عِنْدِي أَوَلَمْ يَعْلَم أَنَّ اللَّهَ قَدْ أَهْلَكَ مِن قَبْلِهِ مِنَ الْقُرُونِ
مَنْ هُوَ أَشَدُّ مِنْهُ قُوَّةً وَأَكْثَرُ جَمْعًا وَلَا يُسْأَلُ عَنْ ذُنُوبِهِمُ الْمُجْرِمُونَ(٧٨)

Ertinya : Qārūn menjawab (dengan sombongnya) : "Aku diberikan harta kekayaan ini hanyalah disebabkan pengetahuan dan kepandaian yang ada padaku". (Kalaupun Qārūn bijak pandai) tidakkah ia mengetahui dan memahami, bahawa Allah telah

membinasakan sebelumnya dari umat-umat yang telah lalu, orang-orang yang lebih kuat daripadanya dan lebih banyak mengumpulkan harta kekayaan ? Dan (ingatlah) orang-orang yang berdosa (apabila mereka disiksa) tidak lagi ditanya tentang dosa-dosa mereka, (karena Allah sedia mengetahuinya).

Terjemahan Surah al-Qashash(28):78

فَفَخَّرَ عَلَىٰ قَوْمِهِ فِي زِينَتِهِ قَالَ الَّذِينَ يُرِيدُونَ الْحَيَاةَ الدُّنْيَا يَا لَيْتَ لَنَا مِثْلَ مَا
أُوْتِيَ قَارُونُ إِنَّهُ لَذُو حَظٍّ عَظِيمٍ (٧٩)

Ertinya : Kemudian Qārūn keluar kepada kaumnya dengan memakai perhiasannya. (Pada saat itu) berkatalah orang-orang yang semata-mata inginkan kesenangan kehidupan dunia : “Alangkah baiknya kalau kita ada kekayaan seperti yang didapati Qārūn! Sesungguhnya ia adalah seorang yang bernasib baik”.

Terjemahan Surah al-Qashash(28):79

وَقَالَ الَّذِينَ أُوتُوا الْعِلْمَ وَيَلَكُمْ نَوَابُ اللَّهِ خَيْرٌ لِّمَنْ آمَنَ وَعَمِلَ صَالِحًا وَلَا يُلَاقَاهَا
إِلَّا الصَّابِرُونَ (٨٠)

Ertinya : Dan berkata pula orang-orang yang diberi ilmu (diantara mereka) : “Janganlah kamu berkata demikian, pahala dari Allah lebih baik bagi orang yang beriman dan beramal sholeh, dan tidak akan dapat menerima (pahala yang demikian) itu melainkan orang yang sabar”.

Terjemahan Surah al-Qashash(28):80

فَخَسَفْنَا بِهِ وَبِدَارِهِ الْأَرْضَ فَمَا كَانَ لَهُ مِنْ فِئَةٍ يَنْصُرُوهُ مِنْ دُونِ اللَّهِ وَمَا كَانَ
 مِنَ الْمُنتَصِرِينَ (٨١)

Ertinya : Lalu Kami timbuskan dia bersama-sama dengan rumahnya di dalam tanah, maka tidaklah ia mendapat sebarang golongan yang boleh menolongnya dari azab Allah, dan ia pula tidak dapat menolong dirinya sendiri.

Terjemahan Surah al-Qashash(28):81

وَأَصْحَابِ الَّذِينَ تَمَنَوْا بِمَكَانِهِ بِالْأَمْسِ يُقُولُونَ وَيَكْفُرُونَ اللَّهُ يَسْطُرُ الرِّزْقَ لِمَنْ يَشَاءُ
 مِنْ عِبَادِهِ وَيَقْدِرُ لَوْ لَا أَنْ مِنَ اللَّهِ عَلَيْنَا لَخَسَفَ بِنَا وَيَكْفُرُونَ لَا يُفْلِحُ الْكَافِرُونَ (٨٢)

Ertinya : Dan orang-orang yang pada masa dahulu bercita-cita mendapat kekayaan seperti Qārūn mulai sadar sambil berkata : "Wah ! Sesungguhnya Allah memewahkan rizki bagi sesiapa yang dikehendakiNya dari hamba-hambanya, dan Dialah juga yang menyempitkannya, kalau tidak kerana Allah memberi pertolongan kepada kita tentulah kita akan dibinasakan dengan tertimbus di dalam tanah (seperti Qārūn). Aduhai ! Sesungguhnya orang-orang yang kufur nikmat Allah itu tidak akan berjaya!".

Terjemahan Surah al-Qashash(28):82

Kisah-kisah yang diceritakan di dalam al-Qur'an tersebut memberi pengajaran dan keinsafan bagi orang yang boleh berfikir. Mereka tidak akan melakukan perbuatan yang akan menimbulkan murka Allah SWT seperti mana yang dikisahkan di dalam al-Qur'an. Hal ini menunjukkan bahawa metod penceritaan adalah salah satu metod yang sangat berkesan yang digunakan oleh al-

Qur'an untuk menegah penyakit sosial dan krisis moral yang semakin bermaharajalela pada zaman moden ini.

4.4.3 Metod Pengajaran Dan Nasihat (*Maw'izhah*)

Al-Qur'an al-Karim adalah kitab nasihat dan petunjuk, kitab hukum dan keterangan. Allah SWT menurunkannya untuk menjadi pedoman abadi, menuntun manusia dan menunjukkan ke jalan yang lurus.

Firman Allah SWT di dalam surah *Ali Imran* : 138 :

هَذَا بَيَانٌ لِلنَّاسِ وَهُدًى وَمَوْعِظَةٌ لِّلْمُتَّقِينَ (۱۳۸)

Ertinya : (Al-Qur'an) ini menjadi keterangan bagi seluruh umat manusia dan menjadi petunjuk dan pengajaran bagi orang-orang yang bertaqwa.

Terjemahan Surah Ali Imran(3):138

Dari sudut etimologinya "*Mauizhah*" bererti nasihat, kata tersebut selari dengan makna kata "*Wa'azha*", "*ya'izhu*", "*wa'zhan*", "*wa izhatan*", dan "*mau'izhatan*" yang bererti memberi nasihat. 'Abd al-Rahmān al-Naḥlāwī mendefinisikan *maw'izhah* sebagai sesuatu yang dapat mengingatkan seseorang dengan sesuatu yang dapat melembutkan kalbunya, yang menyangkut hal pahala atau seksa, yang disajikan dalam bentuk nasihat yang menyentuh, sehingga menimbulkan kesadaran pada dirinya. Istilah *maw'izhah* disebut juga sebagai *al-wa'zhu*, iaitu pemberian nasihat dan peringatan akan kebaikan dan kebenaran dengan cara menyentuh kalbu dan menggugah perasaan untuk diamalkannya²⁷.

²⁷ 'Abd al-Rahmān al-Naḥlāwī 1979. *Uṣūl al-Tarbiyah al-Islāmiyah wa Asālibiha fi al-Bait wa al-Madrasah wa al-Mujtama*. Dar al-Fikr Damascus. h. 43

Sebagai mana diketahui bahawa di dalam penerapannya, ajaran Islam sentiasa selari dengan potensi dan proses penciptaan manusia, iaitu akal dan perasaan, oleh yang demikian, metod yang ditawarkan oleh al-Qur'ān dalam usaha untuk menghindarkan manusia daripada krisis moral dan penyakit sosial ini selalu dihubungkan dengan unsur-unsur kemanusiaan. Manusia mempunyai ciri dan sifat yang selalu mengikutinya, iaitu lupa. Atas dasar inilah metod nasihat sangat diperlukan, untuk mengingatkan kembali manusia tersebut dikala ia lupa. Penggunaan metod *maw'izah* ini adalah dimaksudkan untuk dijadikan pendorong yang kuat dalam menimbulkan rasa takut dalam memandang perbuatan yang tidak semestinya dilakukan. Dengan kata lain, metod *maw'izah* ini akan membimbing fitrah potensi baik dalam diri manusia agar tetap berada dalam kebaikan dan berkembang menuju kesempurnaan, serta menghalang potensi buruk agar tidak berkembang.

Contoh metod pengajaran dan nasihat dalam al-Qur'ān dapat dilihat dalam surah *Luqmān* ayat 13 – 19 yang memaparkan nasihat *Luqmān al-Hakīm* kepada anaknya²⁸, firman Allah SWT :

وَإِذْ قَالَ لُقْمَانُ لِابْنِهِ وَهُوَ يَعِظُهُ يَا بُنَيَّ لَا تُشْرِكْ بِاللَّهِ إِنَّ الشِّرْكَ لَظُلْمٌ عَظِيمٌ (١٣)

Ertinya : Dan (ingatlah) ketika Luqmān berkata kepada anaknya, semasa ia memberi nasihat kepadanya : “Wahai anak kesayanganku, janganlah engkau mempersekutukan Allah (dengan sesuatu yang lain), sesungguhnya perbuatan syirik itu adalah satu kezaliman yang besar”.

Terjemahan Surah Luqmān(31):13

²⁸ Şadiq ibn Hasan ibn 'Aly(1965) *op cit* h.282

وَوَصَّيْنَا الْإِنْسَانَ بِوَالِدَيْهِ حَمَلَتْهُ أُمُّهُ وَهَنَا عَلَى وَهْنٍ وَفِصَالُهُ فِي عَامَيْنِ أَنْ اشْكُرْ

لِي وَلِوَالِدَيْكَ إِلَيَّ الْمَصِيرُ (١٤)

Ertinya : Dan Kami wajibkan manusia berbuat baik kepada ibu bapanya, ibunya telah mengandungnya dengan menanggung kelemahan demi kelemahan (dari awal mengandung hingga akhir menyusunya), dan tempoh menceraikan susunya ialah dalam masa dua tahun, (dengan yang demikian) bersyukurlah kepadaKu dan kepada kedua ibu bapamu, dan (ingatlah), kepada Aku jua tempat kembali (untuk menerima balasan).

Terjemahan Surah Luqmān(31):14

وَإِنْ جَاهَدَاكَ عَلَى أَنْ تُشْرِكَ بِي مَا لَيْسَ لَكَ بِهِ عِلْمٌ فَلَا تُطِعْهُمَا وَصَاحِبِهُمَا فِي

الدُّنْيَا مَعْرُوفًا وَاتَّبِعْ سَبِيلَ مَنْ أَنَابَ إِلَيَّ ثُمَّ إِلَيَّ مَرْجِعُكُمْ فَأُنَبِّئُكُمْ بِمَا كُنتُمْ

تَعْمَلُونَ

Ertinya : Dan jika mereka berdua mendesakmu supaya engkau mempersekutukan denganKu sesuatu yang engkau (dengan fikiran sehatmu) tidak mengetahui sungguh adanya maka janganlah engkau taat kepada mereka, dan bergaullah dengan mereka di dunia dengan cara yang baik. Dan turutlah jalan orang-orang yang taubat kepadaku (dengan tauhid dan amal-amal yang soleh). Kemudian kepada Akulah tempat kembali kamu semuanya, maka Aku akan menerangkan kepada kamu segala yang kamu telah kerjakan.

Terjemahan Surah Luqmān(31):15

يَا بَنِيَّ إِنَّهَا إِنْ تَكُنْ مِثْقَالَ حَبَّةٍ مِنْ خَرْدَلٍ فَتَكُنْ فِي صَخْرَةٍ أَوْ فِي السَّمَاوَاتِ أَوْ فِي الْأَرْضِ يَأْتِ بِهَا اللَّهُ إِنَّ اللَّهَ لَطِيفٌ خَبِيرٌ (١٦)

Ertinya : (Luqman menasihati anaknya dengan berkata) : “Wahai anak kesayanganku, sesungguhnya jika ada sesuatu perkara (yang baik atau yang buruk) sekalipun seberat biji Sawi, serta ia tersembunyi di dalam batu besar atau di langit ataupun di bumi, sudah tentu akan dibawa oleh Allah (untuk dihakimi dan dibalasNya), sesungguhnya Allah maha halus pengetahuannya, lagi amat meliputi akan segala yang tersembunyi”.

Terjemahan Surah Luqman(31):16

يَا بَنِيَّ أَقِمِ الصَّلَاةَ وَأْمُرْ بِالْمَعْرُوفِ وَانْهَ عَنِ الْمُنْكَرِ وَأَصْبِرْ عَلَىٰ مَا أَصَابَكَ إِنْ ذَلِكَ مِنْ عَزْمِ الْأُمُورِ (١٧)

Ertinya : “Wahai anak kesayanganku, dirikanlah solat dan suruhlah berbuat kebaikan, serta laranglah daripada melakukan perbuatan yang mungkar, dan bersabarlah atas segala bala bencana yang menimpamu, sesungguhnya yang demikian itu adalah dari perkara-perkara yang dikehendaki diambil berat melakukannya”.

Terjemahan Surah Luqman(31):17

وَلَا تُصَعِّرْ خَدَّكَ لِلنَّاسِ وَلَا تَمْشِ فِي الْأَرْضِ مَرْحًا إِنَّ اللَّهَ لَا يُحِبُّ كُلَّ مُخْتَالٍ فَخُورٍ (١٨)

Ertinya : “Dan janganlah engkau memalingkan mukamu (kerana memandang rendah) kepada manusia, dan janganlah engkau berjalan di muka bumi dengan berlagak sombong, sesungguhnya Allah tidak suka kepada tiap-tiap orang yang sombong takbur, lagi membanggakan diri”.

Terjemahan Surah Luqmān(31):18

وَأَقْصِدْ فِي مَشْيِكَ وَاغْضُضْ مِنْ صَوْتِكَ إِنَّ أَنْكَرَ الْأَصْوَاتِ لَصَوْتُ الْحَمِيرِ

Ertinya : “Dan sederhanakanlah langkahmu semasa berjalan, juga rendahkanlah suaramu (semasa berkata-kata), sesungguhnya seburuk-buruk suara ialah suara keldai”.

Terjemahan Surah Luqmān(31):19

Walaupun ayat-ayat tersebut menceritakan tentang hal *Luqmān al-Hakīm* menasihati anaknya, ia secara langsung menasihati setiap pembaca al-Qur’ān. Dan secara tidak langsung memberitahu kita bahawa ini adalah salah satu metod al-Qur’ān untuk memberi pedoman kepada manusia agar menjauhi segala perbuatan yang dimurkai oleh Allah SWT.

Jika diperhatikan firman Allah SWT di dalam surah *Luqmān* ayat 13 – 19 di atas, maka dapat dilihat bahawa nasihat di dalam ayat tersebut terfokus kepada dua aspek, iaitu aspek *aqidah tauhid* dan aspek akhlak. Aspek *aqidah tauhid* dalam ayat tersebut menasihati manusia untuk meneguhkan aqidah dan menguatkan iman dengan menjauhi perbuatan syirik. Aspek aqidah ini diperkuat dengan nasihat untuk mendirikan sholat, larangan melakukan perbuatan keji dan maksiat serta bersabar atas segala musibah yang menimpa.

Aspek akhlak pula dimulai dengan nasihat untuk berbuat baik kepada orang tua dan cara bermuamalah dengan mereka. Kemudian pada aspek akhlak ini juga ditekankan untuk menjauhi sifat sombong dan bongkak dan menyederhanakan perjalanan serta merendahkan suara. Dari ayat-ayat Allah SWT tersebut terlihat dengan nyata manifestasi ke maha besaran Allah SWT, dan betapa al-Qur'an telah mengantisipasi segala krisis yang akan terjadi dalam kehidupan manusia, sama ada krisis aqidah mahupun akhlak dengan metodenya yang khas²⁹.

Metod nasihat yang diguna pakai oleh al-Qur'an juga bertujuan untuk menegah sebelum terjadinya perbuatan-perbuatan maksiat yang akhirnya menjurus kepada gejala sosial dan krisis moral, hal ini dapat dilihat pada firman Allah SWT di dalam surah *al-Nūr* ayat 30 – 31 :

قُلْ لِلْمُؤْمِنِينَ يَعْضُوا مِنْ أَبْصَارِهِمْ وَيَحْفَظُوا فُرُوجَهُمْ ذَلِكَ أَزْكَى لَهُمْ إِنَّ اللَّهَ

خَبِيرٌ بِمَا يَصْنَعُونَ (٣٠)

Ertinya : Katakanlah (wahai Muhammad) kepada orang-orang lelaki yang beriman supaya mereka menyekat pandangan mereka (daripada memandang yang haram), dan memelihara kehormatan mereka. Yang demikian itu lebih suci bagi mereka, sesungguhnya Allah amat mendalam pengetahuannya tentang apa yang mereka kerjakan.

Terjemahan Surah al-Nūr(24):30

²⁹ ibid h.287

وَقُلْ لِلْمُؤْمِنَاتِ بَعْضُنَّ مِنْ أَبْصَارِهِنَّ وَيَحْفَظْنَ فُرُوجَهُنَّ وَلَا يُبْدِينَ زِينَتَهُنَّ إِلَّا
 مَا ظَهَرَ مِنْهَا وَلْيَضْرِبْنَ بِخُمُرِهِنَّ عَلَىٰ جُيُوبِهِنَّ وَلَا يُبْدِينَ زِينَتَهُنَّ إِلَّا لِبُعُولَتِهِنَّ أَوْ
 آبَائِهِنَّ أَوْ آبَاءِ بُعُولَتِهِنَّ أَوْ أَبْنَائِهِنَّ أَوْ أَبْنَاءِ بُعُولَتِهِنَّ أَوْ إِخْوَانِهِنَّ أَوْ بَنِي إِخْوَانِهِنَّ
 أَوْ بَنِي أَخْوَاتِهِنَّ أَوْ نِسَائِهِنَّ أَوْ مَا مَلَكَتْ أَيْمَانُهُنَّ أَوِ التَّابِعِينَ أَوْ التَّابِعَاتِ وَالْحَائِلِينَ
 الرَّابِئَاتِ مِنَ الرِّجَالِ أَوْ الطِّفْلِ الَّذِينَ لَمْ يَظْهَرُوا عَلَىٰ عَوْرَاتِ النِّسَاءِ وَلَا يُضْرَبْنَ
 بِأَرْجُلِهِنَّ لِيُعْلَمَ مَا يُخْفِينَ مِنْ زِينَتِهِنَّ وَتُوبُوا إِلَى اللَّهِ جَمِيعًا أَيُّهَا الْمُؤْمِنُونَ
 لَعَلَّكُمْ تُفْلِحُونَ (٣١)

Ertinya : Dan katakanlah kepada perempuan-perempuan yang beriman supaya menyekat pandangan mereka (daripada memandang yang haram), dan memelihara kehormatan mereka, dan janganlah mereka memperlihatkan perhiasan tubuh mereka kecuali yang zahir daripadanya, dan hendaklah mereka menutup belahan leher bajunya dengan tudung kepala mereka, dan janganlah mereka memperlihatkan perhiasan tubuh mereka melainkan kepada suami mereka, atau bapa mereka atau bapa mertua mereka atau anak-anak mereka, atau anak-anak tiri mereka, atau saudara saudara mereka, atau anak bagi saudara-saudara mereka yang lelaki, atau anak bagi saudara-saudara mereka yang perempuan, atau perempuan-perempuan Islam, atau hamba-hamba mereka, atau orang gaji dari orang-orang lelaki yang telah tua dan tidak berkeinginan kepada perempuan, atau kanak-kanak yang belum mengerti lagi tentang aurat perempuan, dan janganlah mereka menghentakkan kaki untuk diketahui orang akan apa yang tersembunyi dari perhiasan mereka, dan

bertaubatlah kamu sekalian kepada Allah SWT, wahai orang-orang yang beriman supaya kamu berjaya.

Terjemahan Surah al-Nūr(24):31

Ayat ini memerintahkan kepada kaum lelaki agar menjaga mata mereka daripada memandang yang dilarang atau kepada sesuatu yang dapat menjerumuskan mereka ke jurang kemaksiatan. Mereka juga diperintahkan untuk mengawal hawa nafsu mereka dengan menjaga kemaluan. Ayat ini juga memerintahkan kepada kaum wanita agar mereka menutup aurat, memelihara pandangan dan menjaga kehormatannya³⁰.

Metod nasihat yang diguna pakai oleh ayat ini telah memberikan jalan keluar agar tidak terjerumus ke dalam jurang maksiat seperti sex bebas, zina dan pergaulan yang dilarang oleh Islam. Berpandukan ayat ini dapatlah kita ambil kesimpulan bahawa sebenarnya daripada awal-awal lagi al-Qur'an sudah mengantisipasi terjadinya pergaulan bebas, zina serta perbuatan maksiat lainnya seperti yang termaktub di dalam ayat-ayat al-Qur'an³¹.

4.4.4 Metod Ancaman Dan Janji (*Tarhīb – Tarhīb*)

Allah SWT menciptakan manusia sebagai makhluk yang sempurna dan dibekali dengan pelbagai potensi yang sempurna. Sebahagian daripada potensi tersebut adalah kecenderungan kepada kebaikan dan kesesatan. Namun demikian potensi

³⁰ ibid h.413

³¹ Drs. 'Abdul Rahmān 'Abdullah. Di adaptasi Muhammad Helmi 1996. *Pendidikan al-Qur'an Membina Minda Dan Jiwa Cemerlang*.Perniagaan Jahabersa Johor Baru h.183

dasar yang ada pada manusia itu adalah kecenderungan untuk berbuat kebaikan (*hanīf*). Seperti mana firman Allah SWT di dalam surah *al-Rūm* ayat 30 :

فَأَقِمْ وَجْهَكَ لِلدِّينِ حَنِيفًا فِطْرَةَ اللَّهِ الَّتِي فَطَرَ النَّاسَ عَلَيْهَا لَا تَبْدِيلَ لِخَلْقِ اللَّهِ
ذَلِكَ الدِّينُ الْقَيِّمُ وَلَكِنَّ أَكْثَرَ النَّاسِ لَا يَعْلَمُونَ (٣٠)

Ertinya : (Setelah jelas kesesatan syirik itu) maka hadapkanlah dirimu (engkau dan pengikut-pengikutmu Wahai Muhammad) ke arah agama yang jauh dari kesesatan, turulah terus agama Allah, iaitu agama yang Allah menciptakan manusia (dengan keadaan bersedia dari semula jadinya) untuk menerimanya, tidaklah patut ada sebarang perubahan pada ciptaan Allah itu, itulah agama yang betul lurus tetapi kebanyakan manusia tidak mengetahui.

Terjemahan Surah *al-Rūm*(30):30

Yang dimaksud dengan "*fitrah*" pada ayat diatas adalah kecenderungan manusia untuk memilih kebenaran yang datang daripada Allah SWT. Dan di dalam diri manusia ada pula kemampuan untuk berbuat kesesatan atau kejahatan serta kemampuan untuk memilih di antara kebaikan dan kesesatan. Allah SWT membentangkan dua jalan, iaitu jalan kepada kebaikan dan jalan kepada kesesatan, lalu manusia diberi kebebasan untuk memilih salah satu daripadanya³².

Seperti mana firman Allah SWT di dalam surah *al-Syams* ayat 7 – 8 :

وَنَفْسٍ وَمَا سَوَّاهَا (٧) فَأَلْهَمَهَا فُجُورَهَا وَتَقْوَاهَا (٨)

Ertinya : Demi diri manusia dan yang menyempurnakan kejadiannya (dengan kelengkapan yang sesuai dengan keadaannya). Serta mengilhamkan (untuk mengenal) jalan yang

³² Sadiq ibn Hasan ibn 'Aly(1965) *op cit* h.252

membawanya kepada kejahatan, dan yang membawanya kepada yang bertaqwa.

Terjemahan Surah al-Syams(91):7-8

Kemudian pada ayat lain Allah SWT berfirman dalam surah *al-Balad* ayat 10 :

وَهَدَيْنَاهُ السُّبُلَ (١٠)

Ertinya : Dan kami telah menunjukkan kepadanya dua jalan, (jalan kebaikan untuk dijalaninya, dan jalan kejahatan untuk dijauhinya).

Terjemahan Surah al-Balad(90):10

Walaupun manusia berbeza-beza dalam watak dan perilaku, akan tetapi berdasarkan kepada potensinya, manusia selalu berusaha untuk mencari kebenaran dan kebaikan, terutamanya bagi orang yang menggunakan akal fikirannya secara benar dan jujur. Perbezaan ini sebahagian berpangkal pada diri manusia itu sendiri. Sebahagian yang lain kembali pada watak kemasyarakatan dan pengaruh-pengaruh persekitaran³³.

Kecenderungan untuk berbuat salah akan dapat mengotori jiwa manusia dan akan membawanya kepada kehinaan sama ada di hadapan manusia, terlebih lagi dihadapan Allah SWT. Kedua-dua kecenderungan manusia iaitu kebaikan dan kejahatan akan sentiasa mewarnai perjalanan hidupnya. Oleh yang demikian, jiwa manusia akan sentiasa memerlukan bimbingan dan tuntutan yang benar.

Ajaran Islam memberikan petunjuk kepada manusia agar jiwanya selalu cenderung kepada kebaikan dan berjalan di atas kebenaran Ilahi melalui pelbagai

³³ Drs. Hanafi Mohamad 1996. *Falsafah Pendidikan Menurut al-Qur'an*. Pustaka Ilmi Selangor h.213

cara, di antaranya melalui pendekatan atau metod *targhīb* iaitu rangsangan untuk berbuat baik dan *tarhīb* iaitu ancaman untuk meninggalkan kejahatan.

Potensi yang cenderung kepada kebaikan akan dibimbing melalui rangsangan-rangsangan dan bujukan berupa pahala yang dijanjikan Allah SWT, dan cara ini dalam istilah metodologi Qur'āni di sebut *targhīb*. Sementara potensi yang cenderung kepada kejahatan akan dipagari melalui ancaman-ancaman dan hukuman yang akan ditimpakan kepadanya, cara ini disebut *tarhib*. Kedua bentuk ini dalam istilah al-Qur'ān disebut *thawāb* dan *'iqāb*³⁴.

Pada kedua metod ini, fitrah yang cenderung pada kebaikan akan terus disokong dan dikembangkan, sementara fitrah yang cenderung pada kejahatan ditegah dan dihalang agar tidak berkembang dan ditinggalkan. Dengan metod ini fitrah manusia akan sentiasa terbimbing dan terpelihara daripada perbuatan sesat yang pada hari ini sudah menjadi gejala dan penyakit sosial serta krisis moral yang dapat merugikan dirinya sama ada di dunia dan di akhirat nanti.

Kata "*targhīb*" berasal daripada kata kerja "*ragghaba*" yang bererti menyenangi, menyukai dan mencintai. Kemudian kata tersebut diubah menjadi kata benda "*targhīb*" yang mengandungi makna ; suatu harapan untuk memperolehi kesenangan, kecintaan dan kebahagiaan. Semua itu diwujudkan dalam bentuk janji-janji berupa keindahan dan kebahagiaan yang dapat merangsang atau mendorong seseorang sehingga timbul harapan dan semangat

³⁴ Drs. Syahidin M.Pd. *Op.Cit* h.120

untuk memperolehi³⁵. Secara psikologis, cara tersebut akan menimbulkan daya tarikan yang kuat untuk menggapainya.

Sedangkan istilah “*tarhīb*” berasal daripada kata “*rahhaba*” yang bererti manakut-nakuti atau mengancam. Kemudian kata tersebut diubah kepada kata benda dengan *wazan taf'il* iaitu *tarhīb* yang bererti ancaman dan hukuman³⁶.

Dari huraian di atas dapatlah diambil kesimpulan bahawa *targhīb* adalah metod atau strategi untuk meyakinkan seseorang terhadap kebenaran Allah SWT melalui janjiNya yang disertai dengan bujukan dan ganjaran untuk melakukan amal saleh. Bujukan yang di maksud adalah kesenangan duniawi dan ukhrawi akibat daripada melakukan sesuatu perintah Allah SWT atau menjauhi laranganNya. Sedangkan *tarhīb* pula adalah satu metod atau strategi untuk meyakinkan seseorang terhadap kebenaran Allah SWT melalui ancaman dan siksaan sebagai akibat melakukan perbuatan yang dilarang oleh Allah SWT atau tidak melaksanakan perintah Allah SWT.

Metod *targhīb* dan *tarhīb* ini sangat praktikal sekali untuk mempengaruhi jiwa manusia agar menjauhi segala bentuk perbuatan yang dilarang dan merangsang untuk berbuat kebaikan, ianya di dasarkan pada asumsi bahawa tingkat kesedaran manusia berbeza-beza, di satu pihak ada jenis manusia yang sudah dapat disedarkan hanya melalui nasihat atau teladan yang baik, akan tetapi ada pula sesetengah manusia yang tidak dapat disedarkan kecuali dengan dirangsang dengan bujukan atau ancaman.

³⁵ Ibn Manzūr Jamāl al-Dīn Muḥammad tt. *Lisān al-'Arab. Ibn Mukarram al-Ansarī fashl al-Rā harf al-Ba*. Dār al-Misriyyah Li al-Ta'lif wa al-Tarjamah. Juz I h. 406

³⁶ Ibn Manzūr Jamāl al-Dīn Muḥammad tt. *Lisān al-'Arab. Ibn Mukarram al-Ansarī. Fashl al-ra harf al-Ba*. Dār al-Misriyyah Li al-Ta'lif wa al-Tarjamah. Juz I h.420

Berdasarkan asumsi perbezaan watak dan tingkat kesedaran manusia itu pula, maka bentuk-bentuk rangsangan serta ancaman di dalam al-Qur'an dapat di jumpai dengan pelbagai bentuk janji dan ancaman Allah SWT. Bentuk-bentuk *targhīb* dan *tarhīb* yang ditemui di dalam al-Qur'an di antaranya adalah seperti berikut :

Bentuk-bentuk *targhīb* (rangsangan)

1. Dijanjikan bahawa Allah SWT akan mencintai orang-orang yang sentiasa berbuat kebaikan seperti mana firman Allah SWT di dalam surah *Ali Imrān* ayat 134 :

الَّذِينَ يُتَّقُونَ فِي السَّرَّاءِ وَالضَّرَّاءِ وَالْكَاطِمِينَ الْغَيْظَ وَالْعَافِينَ عَنِ النَّاسِ وَاللَّهُ يُحِبُّ الْمُحْسِنِينَ (١٣٤)

Ertinya : Iaitu orang yang mendermakan hartanya pada masa senang dan susah, dan orang-orang yang menahan kemarahannya, dan orang-orang yang memaafkan kesalahan orang. Dan (ingatlah) Allah mengasihi orang-orang yang berbuat perkara-perkara yang baik.

Terjemahan Surah Ali Imrān(3):134

2. Dijanjikan akan memperolehi kebahagiaan di dunia dan akhirat seperti mana firman Allah SWT di dalam surah *Yūnus* ayat 63 – 64 :

الَّذِينَ آمَنُوا وَكَانُوا يَتَّقُونَ (٦٣) لَهُمُ الْبُشْرَىٰ فِي الْحَيَاةِ الدُّنْيَا وَفِي الْآخِرَةِ لَا تَبْدِيلَ لِكَلِمَاتِ اللَّهِ ذَلِكَ هُوَ الْفَوْزُ الْعَظِيمُ (٦٤)

Ertinya : (Wali-wali Allah itu ialah) orang-orang yang beriman serta mereka pula sentiasa bertaqwa. Untuk mereka sahalah

kebahagiaan yang menggembirakan di dunia dan di akhirat, tidak ada (sebarang perubahan) pada janji-janji Allah yang demikian itulah kejayaan yang besar.

Terjemahan Surah Yūnus(10):63-64

3. Dijanjikan akan mendapat kenikmatan yang langsung dirasakan di dunia, seperti mana firman Allah SWT di dalam surah *al-Talāq* ayat 2 – 3 :

وَمَنْ يَتَّقِ اللَّهَ يَجْعَلْ لَهُ مَخْرَجًا (٢) وَيَرْزُقْهُ مِنْ حَيْثُ لَا يَحْتَسِبُ وَمَنْ يَتَوَكَّلْ

عَلَى اللَّهِ فَهُوَ حَسْبُهُ إِنَّ اللَّهَ بَالِغُ أَمْرِهِ قَدْ جَعَلَ اللَّهُ لِكُلِّ شَيْءٍ قَدْرًا (٣)

Ertinya : Dan sesiapa yang bertaqwa kepada Allah (dengan mengerjakan suruhanNya dan meninggalkan laranganNya), niscaya Allah akan mengadakan baginya jalan keluar (dari segala perkara yang menyusahkan). Serta memberinya rizki dari jalan yang tidak terlintas di hatinya. Dan (ingatlah), sesiapa berserah diri bulat-bulat kepada Allah, maka Allah cukuplah baginya (untuk menolong dan menyelamatkannya). Sesungguhnya Allah tetap melakukan segala perkara yang dikehendakiNya, Allah telahpun menentukan kadar dan masa bagi berlakunya tiap-tiap sesuatu.

Terjemahan Surah al-Talāq(65):2-3

4. Dijanjikan akan mendapat jaminan syurga, seperti mana firman Allah SWT di dalam surah *al-Nisā* ayat 57 :

وَالَّذِينَ آمَنُوا وَعَمِلُوا الصَّالِحَاتِ سَنُدْخِلُهُمْ جَنَّاتٍ تَجْرِي مِنْ تَحْتِهَا الْأَنْهَارُ

خَالِدِينَ فِيهَا أَبَدًا لَهُمْ فِيهَا أَزْوَاجٌ مُطَهَّرَةٌ وَنُدْخِلُهُمْ ظِلًّا ظَلِيلًا (٥٧)

Ertinya : Dan orang-orang yang beriman serta beramal soleh, Kami akan masukkan mereka ke dalam syurga yang mengalir

dibawahnya beberapa sungai, mereka kekal di dalamnya selama-lamanya. Mereka beroleh di dalam syurga itu pasangan-pasangan, isteri-isteri yang suci bersih, serta kami masukkan mereka ke tempat yang teduh yang sentiasa dinaungi.

Terjemahan Surah al-Nisā(4):57

5. Dijanjikan akan mendapat keampunan daripada Allah SWT. Firman Allah SWT di dalam surah *al-Anfāl* ayat 29 :

يَا أَيُّهَا الَّذِينَ آمَنُوا إِن تَتُوبُوا إِلَى اللَّهِ جَعَلْ لَكُمْ فُرْقَانًا وَيُكَفِّرْ عَنْكُمْ سَيِّئَاتِكُمْ وَيَغْفِرْ لَكُمْ وَاللَّهُ ذُو الْفَضْلِ الْعَظِيمِ (٢٩)

Ertinya : Wahai orang-orang yang beriman ! jika kamu bertaqwa kepada Allah, niscaya Ia mengadakan bagi kamu (petunjuk) yang membezakan antara yang benar dengan yang salah, dan menghapuskan kesalahan-kesalahan kamu, serta mengampunkan (dosa-dosa) kamu. Dan Allah (sememangnya) mempunyai limpahan kurnia yang besar.

Terjemahan Surah al-Anfāl(8):29

6. Dijanjikan akan mendapat kenikmatan di syurga. Firman Allah SWT di dalam surah *al-Shaffā* ayat 40 – 49 :

إِلَّا عِبَادَ اللَّهِ الْمُخْلِصِينَ (٤٠) أُولَئِكَ لَهُمْ رِزْقٌ مَّعْلُومٌ (٤١) فَوَاكِهُ وَهُمْ مُكْرَمُونَ (٤٢) فِي حَتَّاتِ النَّعِيمِ (٤٣) عَلَى سُرُرٍ مُتَقَابِلِينَ (٤٤) يُطَافُ عَلَيْهِمْ بِكَأْسٍ مِنْ مَعِينٍ (٤٥) بِيضَاءَ لَذَّةٍ لِلشَّارِبِينَ (٤٦) لَّا فِيهَا غَوْلٌ وَلَا هُمْ عَنْهَا يُرْفُونَ (٤٧) وَعِنْدَهُمْ قَاصِرَاتُ الطَّرْفِ عِينٌ (٤٨) كَأَنَّهُنَّ بَيْضٌ مَكْتُونٌ (٤٩)

Ertinya : Kecuali hamba-hamba Allah yang dibersihkan dari sebarang syirik. Mereka itu beroleh limpahan kurnia yang termaklum. Iaitu buah-buahan (yang lazat), serta mendapat penghormatan. Di dalam syurga-syurga yang penuh melimpah dengan berjenis-jenis nikmat. Mereka duduk berhadap-hadapan di atas pelamin-pelamin besar. Diedarkan kepada mereka piala yang berisi minuman (yang diambil) dari sungainya yang mengalir. Minuman itu putih bersih, lagi lazat rasanya, bagi orang-orang yang meminumnya. Ia tidak mengandungi sesuatu yang membahayakan, dan tidak pula mereka mabuk karena menikmatinya. Sedang di sisi mereka ada pula bidadari-bidadari yang tidak menumpukan pandangannya melainkan kepada mereka, lagi yang amat luas matanya. (Putih kekuning-kuningan) seolah-olah mereka telur (burung kasuari) yang tersimpan dengan sebaik-baiknya.

Terjemahan Surah al-Shaffāt(37):40-49

Dan pada ayat 61 di dalam surah *al-shaffaat* Allah SWT berfirman :

لِمِثْلِ هَذَا فَلْيَعْمَلْ الْعَامِلُونَ (٦١)

Ertinya : Untuk memperoleh (kejayaan) yang seperti inilah hendaknya orang-orang yang beramal melakukan amal usahanya dengan bersungguh-sungguh (di dunia).

Terjemahan Surah al-Shaffāt(37):61

Sedangkan bentuk-bentuk *tarhīb* (ancaman) yang dapat ditemui di dalam al-Qur'an adalah :

1. Ancaman tidak akan mendapat ridha Allah SWT, firman Allah SWT di dalam surah *al-Mā'idah* ayat 87 :

يَا أَيُّهَا الَّذِينَ آمَنُوا لَا تُحَرِّمُوا طَيِّبَاتِ مَا أَحَلَّ اللَّهُ لَكُمْ وَلَا تَعْتَدُوا إِنَّ اللَّهَ لَا يُحِبُّ

الْمُعْتَدِينَ (٨٧)

Ertinya : Wahai orang-orang yang beriman ! janganlah kamu haramkan benda-benda yang baik-baik yang telah dihalaal oleh Allah bagi kamu, dan janganlah kamu melampaui batas (pada apa yang telah ditetapkan halalnya itu), karena sesungguhnya Allah tidak suka kepada orang-orang yang melampaui batas.

Terjemahan Surah al-Mā'idah(5):87

2. Ancaman akan diperangi oleh Allah SWT dan RasulNya, firman Allah SWT di dalam surah *al-Baqarah* ayat 279 :

فَإِنْ لَمْ تَفْعَلُوا فَأْذَنُوا بِحَرْبٍ مِنَ اللَّهِ وَرَسُولِهِ وَإِنْ تُبْتُمْ فَلَكُمْ رُءُوسُ أَمْوَالِكُمْ لَا

تُظْلَمُونَ وَلَا تَظْلَمُونَ (٢٧٩)

Ertinya : Oleh itu, kalau kamu tidak juga melakukan (perintah mengenai larangan riba itu), maka ketahuilah kamu akan adanya peperangan dari Allah dan RasulNya, (akibatnya kamu tidak menemui selamat). Dan jika kamu bertaubat, maka hak kamu (yang sebenarnya) ialah pokok asal harta kamu. (Dengan yang demikian) kamu tidak berlaku zalim kepada sesiapa, dan kamu juga tidak dizalimi oleh sesiapa.

Terjemahan Surah al-Baqarah(2):279

3. Diancam dengan hukuman di dunia, firman Allah SWT di dalam surah *al-Taubah* ayat 74 :

وَأِنْ يَتُوبُوا يُعَذِّبَهُمُ اللَّهُ عَذَابًا أَلِيمًا فِي الدُّنْيَا وَالْآخِرَةِ وَمَا لَهُمْ فِي الْأَرْضِ مِنْ
وَلِيٍّ وَلَا نَصِيرٍ (٧٤)

Ertinya : Dan jika mereka berpaling (ingkar), Allah akan menyiksa mereka dengan azab siksa yang tidak terperi sakitnya di dunia dan akhirat, dan mereka tidak akan mendapat sesiapapun di bumi ini, yang akan menjadi pelindung dan juga yang menjadi penolong.

Terjemahan Surah al-Taubah(9):74

4. Ancaman mendapat siksaan langsung di dunia, firman Allah SWT di dalam surah *al-Mā'idah* ayat 38 :

وَالسَّارِقُ وَالسَّارِقَةُ فَاقْطَعُوا أَيْدِيَهُمَا حِزَاءً بِمَا كَسَبَا نَكَالًا مِنَ اللَّهِ وَاللَّهُ عَزِيزٌ
حَكِيمٌ (٣٨)

Ertinya : Dan orang lelaki yang mencuri dan orang perempuan yang mencuri maka (hukumnya) potonglah tangan mereka sebagai satu balasan dengan sebab apa yang mereka telah usahakan, (juga sebagai) suatu hukuman pencegah dari Allah. Dan (ingatlah) Allah maha kuasa, lagi maha bijaksana.

Terjemahan Surah al-Mā'idah(5):38

5. Diancam hukuman di akhirat, firman Allah SWT di dalam surah *al-Furqān* ayat 68-69 :

وَالَّذِينَ لَا يَدْعُونَ مَعَ اللَّهِ إِلَهًا آخَرَ وَلَا يَقْتُلُونَ النَّفْسَ الَّتِي حَرَّمَ اللَّهُ إِلَّا بِالْحَقِّ
وَلَا يَزْنُونَ وَمَنْ يَفْعَلْ ذَلِكَ يَلْقَ أَثَامًا (٦٨) يُضَاعَفْ لَهُ الْعَذَابُ يَوْمَ الْقِيَامَةِ
وَيَخْلُدْ فِيهِ مُهَانًا (٦٩)

Ertinya : Dan juga mereka yang tidak menyembah sesuatu yang lain bersama-sama Allah, dan tidak membunuh jiwa yang diharamkan Allah membunuhnya, kecuali dengan jalan yang hak (yang dibenarkan oleh syarak), dan tidak pula berzina, dan sesiapa melakukan yang demikian, akan mendapat balasan dosanya. Akan digandakan baginya azab siksa pada hari kiamat, dan ia pula akan kekal di dalam azab itu dengan menerima kehinaan.

Terjemahan Surah al-Furqān(25):68-69

6. Diancam hukuman neraka, firman Allah SWT di dalam surah *al-Baqarah* ayat 39 :

وَالَّذِينَ كَفَرُوا وَكَذَّبُوا بِآيَاتِنَا أُولَٰئِكَ أَصْحَابُ النَّارِ هُمْ فِيهَا خَالِدُونَ (٣٩)

Ertinya : Dan orang-orang kafir yang mendustakan ayat-ayat keterangan kami, mereka itu ialah ahli neraka, mereka kekal di dalamnya.

Terjemahan Surah al-Baqarah(2):39

Dengan penggunaan metod ancaman dan janji (*targhib* dan *tarhib*) ini akan timbul beberapa pengaruh positif pada diri manusia, di antaranya :

1. Meningkatnya rasa kesedaran dan keinsafan pada diri manusia dengan janji Allah SWT.
2. Meningkatkan rasa optimis dan menumbuhkan rasa kehati-hatian dalam melakukan apa juga perbuatan.
3. Menambahkan rasa takut kepada Allah SWT dan rasa takut atas akibat buruk yang akan timbul jika melakukan kesenangan yang melanggar syariat Allah SWT.

4. Menimbulkan perasaan *khauf* (takut), *khusyu'*, *hub* (cinta) dan *rajā'* (harap) kepada Allah SWT.
5. Memberikan rangsangan kepada manusia untuk merealisasikan kebenaran di alam kehidupan manusia sama ada dalam perkataan, sikap dan perbuatan.

4.4.5 Metod Teladan yang Baik (*Qudwah Hasanah*)

Salah satu fitrah yang terdapat di dalam diri manusia adalah fitrah meniru. Fitrah tersebut berupa hasrat dan keinginan yang mendorong seseorang untuk meniru perilaku orang lain. Fitrah meniru ini sudah ada di dalam diri manusia semenjak dari kanak-kanak lagi. Ada beberapa tahapan yang dilalui oleh manusia berkaitan dengan fitrah meniru ini, iaitu :

Pertama : pada setiap manusia, dimulai dari alam kanak-kanak lagi sudah ada pada dirinya suatu dorongan di dalam diri berupa keinginan halus yang tidak dirasakannya untuk meniru orang lain yang dikenalnya dengan rapat sama ada dalam cara berbicara, bergerak, cara bergaul dan sebagainya. Kebanyakannya peniruan anak adalah pada tingkah laku orang yang dilihatnya, dan proses peniruan itu terjadi tanpa disengajanya. Peniruan kanak-kanak pada usia belum *mumayyiz* ini mencakupi semua tingkah laku yang dilihatnya sama ada baik atau buruk, kerana mereka belum mempunyai filter untuk menyaring mana yang baik dan buruk.

Kedua : Pada usia tertentu, biasanya setelah *mumayyiz* manusia sudah mempunyai kesiapan untuk meniru. Potensi ini ada pada manusia sesuai dengan perkembangan kejiwaannya.

Ketiga : Dalam melakukan peniruan, pada diri manusia itu ada suatu tujuan yang bersifat naluriah, iaitu harapan akan memperolehi atau mempunyai tingkah laku atau gaya seperti sosok yang ditirunya itu. Atas dasar fitrah meniru dalam diri manusia itu maka dalam menangani krisis moral dan penyakit sosial al-Qur'an menggunakan metod keteladanan atau *qudwah hasanah*. Metod ini sangatlah besar pengaruhnya dalam menangani permasalahan sosial yang berlaku pada saat ini.

Pada saat terjadi krisis dan penderitaan sosial biasanya orang kehilangan arah dan pegangan, sehingga mudah mengikut arus keadaan. Pada saat ini seseorang itu sangat memerlukan figur yang dapat diteladani sama ada dalam perilaku kehidupan pribadi dan kehidupan sosialnya.

Di dalam al-Qur'an telah dijelaskan Allah SWT bahawa dalam diri Rasulullah Saw terdapat contoh teladan yang sempurna yang mencerminkan kandungan al- Qur'an secara menyeluruh³⁷, seperti mana firman Allah SWT di dalam surah *al-Ahzāb* ayat 21 :

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُو اللَّهَ وَالْيَوْمَ الْآخِرَ
وَذَكَرَ اللَّهَ كَثِيرًا(٢١)

Ertinya : Dan sesungguhnya, adalah bagi kamu pada diri Rasulullah contoh ikutan (teladan) yang baik, iaitu bagi orang yang sentiasa mengaharapkan (keridhaan) Allah dan (balasan baik) pada hari akhirat, serta ia pula menyebut dan mengingati Allah banyak-banyak (pada masa susah dan senang).

Terjemahan Surah al-Ahzāb(33):21

³⁷ ibid h.347

Dari ayat di atas dapatlah diambil kesimpulan bahwa pada diri Rasulullah Saw terdapat contoh yang sempurna, seolah-olah di dalam diri Rasulullah Saw telah disusun metodologi akhlak dan pendidikan Islam yang dapat dijadikan teladan manusia sepanjang zaman, sehingga ketika isteri Rasulullah Saw iaitu Aisyah r.a pernah ditanya tentang pribadi dan akhlak Rasulullah Saw, beliau menjawab bahawa pribadi dan akhlak Rasulullah Saw adalah al-Qur'an. Sebuah jawapan yang sangat ringkas dan singkat, akan tetapi pengertiannya amatlah dalam, luas dan mengagumkan.

Rasulullah Saw merupakan teladan terbesar bagi segenap umat manusia. Beliau adalah seorang pemimpin, pendidik, da'i, pejuang, kepala keluarga, suami, ayah, dan seorang yang memberikan petunjuk kepada manusia dengan tingkah lakunya sendiri sebelum dengan kata-kata yang baik. Rasulullah Saw merupakan contoh teladan yang universal bagi seluruh umat manusia³⁸. Hal ini ditegaskan Allah SWT pada firmanNya di dalam surah *Saba'* ayat 28 :

وَمَا أَرْسَلْنَاكَ إِلَّا كَافَّةً لِّلنَّاسِ بَشِيرًا وَنَذِيرًا وَلَكِنَّ أَكْثَرَ النَّاسِ لَا يَعْلَمُونَ (٢٨)

Ertinya : Dan tiadalah Kami mengutusMu (wahai Muhammad) melainkan untuk umat manusia seluruhnya, sebagai Rasul pembawa berita gembira (kepada orang-orang yang beriman), dan pemberi amaran (kepada orang-orang yang ingkar) akan tetapi kebanyakan manusia tidak mengetahui (hakikat itu).

Terjemahan Surah *Saba'*(34):28

Dan di dalam ayat lain Allah SWT menjelaskan pula pada firmanNya di dalam surah *al-Anbiya'* ayat 107 :

³⁸ ibid h.452

وَمَا أَرْسَلْنَاكَ إِلَّا رَحْمَةً لِّلْعَالَمِينَ (١٠٧)

Ertinya : Dan tiadalah Kami mengutuskan Engkau (wahai Muhammad), melainkan untuk menjadi rahmat bagi sekalian alam.

Terjemahan Surah al-Anbiyā(21):107

Kita sedari bahawa manusia telahpun diberi fitrah untuk mencari teladan yang baik yang dapat dijadikan pedoman serta dapat menerangi jalan kebenaran. Kerana itu metod keteladanan ini adalah merupakan salah satu metodologi al-Qur'an di dalam menangani krisis moral serta penyakit sosial yang semakin bermaharajalela saat ini.

Dengan mencladani diri dan kehidupan Rasulullah Saw serta orang-orang sholeh yang berada di jalan Allah SWT akan menghindarkan manusia daripada terjerumus ke dalam jurang kehancuran yang disebabkan perbuatan-perbuatan yang melanggar syariat dan menyimpang dari *akhlāqul karīmah*.

Sebagai insan yang beriman adalah menjadi kewajiban mentaati dan mengikuti segala perilaku atau *sunnah* Rasulullah Saw di dalam segala bidang dan kehidupannya. Maka dari itu, segala mutiara teladan yang baik itu hendaklah diterapkan kepada generasi dan umat manusia yang seterusnya. Firman Allah SWT di dalam surah *Ali Imrān* ayat 132 :

وَأَطِيعُوا اللَّهَ وَالرَّسُولَ لَعَلَّكُمْ تُرْحَمُونَ (١٣٢)

Ertinya : Dan taatlah kamu kepada Allah dan RasulNya, supaya kamu diberi rahmat.

Terjemahan Surah Ali Imrān(3):132

4.4.6 Metod Peringatan (*Tazkirah*)

Al-Qur'an menempatkan manusia pada tempat yang tinggi dan mulia, kerana manusia memiliki ciri khas yang membezakannya dengan makhluk lainnya, iaitu adanya akal untuk berfikir. Manusia di dalam Islam dipandang sebagai khalifah yang mempunyai watak dasar dan potensi atau fitrah yang baik, yang dalam perkembangannya sangat dipengaruhi oleh pelbagai faktor yang datang dari dalam dan luar dirinya. Selain daripada mempunyai fitrah dasar yang baik, manusia juga mempunyai sifat yang tak dapat lepas daripadanya iaitu sifat lupa.

Lupa ialah sifat yang ada pada manusia. Al-Qur'an pula sifatnya memberi peringatan. Malah salah satu daripada nama al-Qur'an adalah *al-Zikr* yakni peringatan. Sepertimana firman Allah SWT di dalam surah *al-Hijr* ayat 9 :

إِنَّا نَحْنُ نَزَّلْنَا الذِّكْرَ وَإِنَّا لَهُ لَحَافِظُونَ (٩)

Ertinya : Sesungguhnya Kami lah yang menurunkan al-Zikr (al-Qur'an), dan kamilah yang memelihara dan menjaganya.

Terjemahan Surah al-Hijr(15):9

Ayat tersebut menyebut al-Qur'an sebagai *al-Zikr* iaitu peringatan sebagai mana yang memberi peringatan kepada manusia. Manusia tidak dapat melepaskan dirinya daripada sifat lupa, sehingga sebuah pepatah arab mengatakan :

الإنسان مكان الخطاء والنسيان

Ertinya : Manusia itu adalah tempatnya kesalahan dan lupa.

Di saat manusia lupa, maka ia memerlukan suatu peringatan yang akan mengingatkannya dan menghalangnya daripada terus berbuat dosa. Watak dan peribadi manusia adalah berbeza-beza. Ada jenis manusia yang cukup diberi peringatan ringan, ia sudah insaf dan sedar. Akan tetapi adapula jenis manusia yang mesti diperingatkan dengan peringatan yang keras barulah ia sedar.

Al-Qur'ān dengan metodenya yang sangat istimewa sangat memahami watak manusia ini, sehingga peringatan di dalam al-Qur'ān ada yang bersifat tegas dan ada yang sangat tegas serta disertai dengan ancaman. Metod peringatan atau *tazkirah* ini adalah salah satu daripada metodologi al-Qur'ān untuk membendung terjadinya penyakit sosial dan krisis moral. Al-Qur'ān memberi peringatan kepada manusia perkara-perkara yang dimurkai Allah SWT, ianya akan mendidik dan membina ummah agar selalu menghindari diri daripada segala perkara yang dilarang melalui peringatan tersebut³⁹. Firman Allah SWT di dalam surah *al-An'ām* ayat 51 :

وَأَنْذِرْ بِهِ الَّذِينَ يَخَافُونَ أَنْ يُحْشَرُوا إِلَىٰ رَبِّهِمْ لَيْسَ لَهُمْ مِنْ دُونِهِ وَاٰلِيٓهِ وَسَلَّمَ وَلَا شَفِيعَ

لَعَلَّهُمْ يَتَّقُونَ (٥١)

Ertinya : Dan berilah amaran dengan al-Qur'ān itu kepada orang-orang yang merasa takut bahawa mereka akan dihimpunkan kepada Tuhan mereka (pada hari kiamat), (padahal) tiadalah bagi mereka pelindung dan tidak juga pemberi syafaat yang lain dari Allah, supaya mereka bertaqwa.

Terjemahan Surah al-An'ām(6):51

³⁹ ibid juz 3 h.165

Dan di dalam ayat lain, Allah SWT menganjurkan kepada manusia yang membaca al-Qur'an dan memahaminya supaya bersikap memberi peringatan. Hal ini termaktub di dalam surah *al-Ghāsyiyah* ayat 21 :

فَذَكِّرْ إِنَّمَا أَنْتَ مُذَكِّرٌ (٢١)

Ertinya : Oleh itu berikanlah sahaja peringatan (wahai Muhammad kepada manusia, dan janganlah berduka cita kiranya ada yang menolaknya), karena sesungguhnya engkau hanyalah seorang Rasul pemberi peringatan.

Terjemahan Surah al-Ghāsyiyah(88)21

Dan firman Allah SWT di dalam surah *al-Zāriyat* ayat 55 :

وَذَكِّرْ فَإِنَّ الذِّكْرَى تَنْفَعُ الْمُؤْمِنِينَ (٥٥)

Ertinya : Dan tetap tekunlah engkau memberi peringatan, karena sesungguhnya peringatan itu mendatangkan faedah kepada orang-orang yang beriman.

Terjemahan Surah al-Zāriyat(51):55

Kedua-dua ayat ini memberi nasihat dan peringatan kepada orang-orang yang membacanya supaya memberi peringatan pula kepada orang lain.

Di antara peringatan-peringatan yang terdapat di dalam al-Qur'an, ada yang berupa suruhan yang diberi penekanan seperti mana firman Allah SWT di dalam surah *al-Nahl* ayat 90 :

إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ

وَالْبَغْيِ يَعِظُكُمْ لَعَلَّكُمْ تَذَكَّرُونَ (٩٠)

Ertinya : Sesungguhnya Allah menyuruh berlaku adil, dan berbuat kebaikan, serta memberi bantuan kepada kaum kerabat, dan melarang daripada melakukan perbuatan-perbuatan yang keji dan mungkar serta kezaliman. Ia mengajar kamu (dengan suruhan dan laranganNya ini), supaya kamu mengambil peringatan mematuhiNya.

Terjemahan Surah al-Nahl(16):90

Ada pula peringatan dengan teguran yang keras dan ancaman seperti mana firman Allah SWT di dalam surah *al-Isrā'* ayat 32 yang merupakan peringatan untuk menjauhi zina :

وَلَا تَقْرُبُوا الزَّانِيَ إِثْمَهُ كَانَ فَاحِشَةً وَسَاءَ سَبِيلًا (٣٢)

Ertinya : Dan janganlah kamu menghampiri zina, sesungguhnya zina itu adalah satu perbuatan yang keji dan satu jalan yang jahat (yang membawa kerosakan).

Terjemahan Surah al-Isrā'(17):32

Peringatan untuk menjauhi zina ini juga terdapat di dalam surah *al-Nur*. Di dalam ayat yang berikut ini peringatan tentang larangan zina disertai dengan ancaman yang keras serta hukumannya⁴⁰. Firman Allah SWT di dalam surah *al-Nūr* ayat 2-3:

الرَّانِيَةُ وَالزَّانِي فَاجْلِدُوا كُلَّ وَاحِدٍ مِنْهُمَا مِائَةَ حَلَّةٍ وَلَا تَأْخُذْكُمْ بِهِمَا رَأْفَةٌ فِي دِينِ اللَّهِ إِنْ كُنْتُمْ تُؤْمِنُونَ بِاللَّهِ وَالْيَوْمِ الْآخِرِ وَلْيَشْهَدْ عَذَابَهُمَا طَائِفَةٌ مِّنْ

⁴⁰ Al-Zajjāj(1997) *op cit* 27-29

الْمُؤْمِنِينَ (۲) الزَّانِي لَا يَنْكِحُ إِلَّا زَانِيَةً أَوْ مُشْرِكَةً وَالزَّانِيَةُ لَا يَنْكِحُهَا إِلَّا زَانٍ أَوْ
مُشْرِكٌ وَحُرْمٌ ذَلِكَ عَلَى الْمُؤْمِنِينَ (۳)

Ertinya : Perempuan yang berzina dan lelaki yang berzina, hendaklah kamu sebat tiap-tiap seorang dari keduanya seratus kali sebat, dan janganlah kamu dipengaruhi oleh perasaan belas kasihan terhadap keduanya dalam menjalankan hukum agama Allah, jika benar kamu beriman kepada Allah dan hari akhirat, dan hendaklah disaksikan hukuman siksa yang dikenakan kepada mereka itu oleh sekumpulan dari orang-orang yang beriman. (2)

Lelaki yang berzina (lazimnya) tidak ingin berkawin melainkan dengan perempuan yang berzina atau perempuan musyrik, dan perempuan yang berzina itu pula (lazimnya) tidak ingin berkawin dengannya melainkan dengan lelaki yang berzina atau lelaki musyrik. Dan perkawinan yang demikian itu terlarang kepada orang-orang yang beriman. (3)

Terjemahan Surah al-Nūr(24):2-3

Peringatan yang keras juga terdapat pada larangan minum arak dan berjudi yang seakan menjadi trend manusia moden hari ini. Kedua-dua perkara ini merupakan penyakit sosial yang paling teruk zaman ini selain daripada zina, pergaulan bebas dan segala bentuk penyelewengan seksual lainnya. Larangan minum arak dan berjudi serta peringatan untuk menjauhinya termaktub di dalam firman Allah SWT di dalam surah *al-Māidah* ayat 90-91 :

يَا أَيُّهَا الَّذِينَ آمَنُوا إِنَّمَا الْخَمْرُ وَالْمَيْسِرُ وَالْأَنْصَابُ وَالْأَزْلَامُ رِجْسٌ مِنْ عَمَلِ

الشَّيْطَانِ فَاجْتَنِبُوهُ لَعَلَّكُمْ تُفْلِحُونَ (۹۰) إِنَّمَا يُرِيدُ الشَّيْطَانُ أَنْ يُوقِعَ بَيْنَكُمْ

الْعَدَاوَةَ وَالْبَغْضَاءَ فِي الْخَمْرِ وَالْمَيْسِرِ وَيَصُدُّكُمْ عَنْ ذِكْرِ اللَّهِ وَعَنِ الصَّلَاةِ فَهَلْ
 أَنْتُمْ مُنْتَهُونَ (٩١)

Ertinya : Wahai orang-orang yang beriman ! bahawa sesungguhnya arak, dan judi, dan pemujaan berhala, dan mengundi nasib dengan batang-batang anak panah, adalah (semuanya) kotor (keji) dari perbuatan syaitan. Oleh itu hendaklah kamu menjauhinya supaya kamu berjaya. (90) Sesungguhnya syaitan itu hanyalah bermaksud mahu menimbulkan permusuhan dan kebencian di antara kamu dengan sebab arak dan judi, dan mahu memalingkan kamu daripada mengingat Allah dan daripada mengerjakan sembahyang. Oleh itu, mahukan kamu berhenti (daripada melakukan perkara-perkara yang keji dan kotor itu atau kamu masih berdegil ?).

Terjemahan Surah al-Māidah(5):90-91

Sebelum peringatan keras tentang minum khamar dan judi ini di dalam al-Qur'an, telah didahului dengan beberapa tahapan larangan sebelumnya. Dimulai dengan larangan mendekati atau mengerjakan shalat ketika mabuk⁴¹, perkara ini termaktub di dalam al-Qur'an surah *al-Nisā* ayat 43 :

يَا أَيُّهَا الَّذِينَ آمَنُوا لَا تَقْرَبُوا الصَّلَاةَ وَأَنْتُمْ سُكَارَىٰ حَتَّىٰ تَعْلَمُوا مَا تَقُولُونَ (٤٣)

Ertinya : Wahai orang-orang yang beriman, janganlah kamu hampiri sembahyang (mengerjakannya) sedang kamu dalam keadaan mabuk, hingga kamu sedar dan mengetahui akan apa yang kamu katakan.

Terjemahan Surah al-Nisā(4):43

⁴¹ Ṣādiq ibn Ḥasan ibn 'Alī(1965) *op cit* h. 348-351

Kemudian tahapan selanjutnya termaktub di dalam firman Allah SWT surah *al-Baqarah* ayat 219 :

يَسْأَلُونَكَ عَنِ الْخَمْرِ وَالْمَيْسِرِ قُلْ فِيهِمَا إِثْمٌ كَبِيرٌ وَمَنْفَعَةٌ لِلنَّاسِ وَإِثْمُهُمَا أَكْبَرُ
مِنْ نَفْعِهِمَا (٢١٩)

Ertinya : Mereka bertanya kepadamu (Wahai Muhammad) mengenai arak dan judi. Katakanlah : "pada keduanya ada dosa besar dan ada pula beberapa manfaat bagi manusia tetapi dosa keduanya lebih besar daripada manfaatnya.

Terjemahan Surah al-Baqarah(2):219

Kemudiannya barulah dilanjutkan dengan peringatan yang keras dan tegas seperti yang termaktub di dalam firman Allah SWT surah *al-Maidah* ayat 90-91 :

يَا أَيُّهَا الَّذِينَ آمَنُوا إِنَّمَا الْخَمْرُ وَالْمَيْسِرُ وَالْأَنْصَابُ وَالْأَزْلَامُ رِجْسٌ مِنْ عَمَلِ
الشَّيْطَانِ فَاجْتَنِبُوهُ لَعَلَّكُمْ تُفْلِحُونَ (٩٠)
إِنَّمَا يُرِيدُ الشَّيْطَانُ أَنْ يُوقِعَ بَيْنَكُمْ الْعَدَاوَةَ وَالْبَغْضَاءَ فِي الْخَمْرِ وَالْمَيْسِرِ
وَيَصُدَّكُمْ عَنْ ذِكْرِ اللَّهِ وَعَنِ الصَّلَاةِ فَهَلْ أَنْتُمْ مُنتَهُونَ (٩١)

Ertinya : Wahai orang-orang yang beriman ! Bahawa sesungguhnya arak dan judi dan pemujaan berhala dan mengundi nasib dengan batang-batang anak panah, adalah (semuanya) kotor (keji) dari perbuatan syaitan. Oleh itu hendaklah kamu menjauhinya supaya kamu berjaya. Sesungguhnya syaitan itu hanyalah bermaksud mahu menimbulkan permusuhan dan kebencian di antara kamu dengan sebab arak dan judi, dan mahu memalingkan kamu daripada mengingati Allah dan daripada

mengerjakan sembahyang. Oleh itu, mahukan kamu berhenti (daripada melakukan perkara-perkara yang keji dan kotor itu atau kamu masih mau berdegil ?).

Terjemahan Surah al-Māidah(5):90-91

Hal ini berlaku kerana minum khamar dan berjudi ini sudah sebatikan dengan kehidupan kaum jahiliah dahulu, sehingga memerlukan tahapan agar tidak membuat mereka apriori terhadap Islam⁴².

Di dalam al-Qur'an terdapat juga peringatan yang mengingatkan manusia untuk menjauhi sifat sombong yang banyak diamalkan masyarakat moden hari ini. Seperti mana firman Allah SWT di dalam surah *al-Isrā'* ayat 37-38 :

وَلَا تَمْشِ فِي الْأَرْضِ مَرَحًا إِنَّكَ لَن تَخْرِقَ الْأَرْضَ وَلَن تَبْلُغَ الْجِبَالَ طُولًا(٣٧)

كُلُّ ذَلِكَ كَانَ سَيِّئُهُ عِنْدَ رَبِّكَ مَكْرُوهًا(٣٨)

Ertinya : Dan janganlah engkau berjalan di muka bumi ini dengan berlagak sombong, kerana sesungguhnya engkau tidak akan dapat menembusi bumi, dan engkau tidak akan dapat menyamai setinggi gunung ganang. Tiap-tiap satu perintah itu, menyalahinya adalah kejahatan yang dibenci di sisi Tuhan.

Terjemahan Surah al-Isrā'(17):37-38

Al-Qur'an memberi peringatan kepada manusia untuk menjauhi perkara-perkara yang dimurkai Allah SWT, ianya akan mendidik dan membina ummah agar selalu menghindarkan diri dari segala perkara yang dilarang melalui peringatan-peringatan tersebut. Firman Allah SWT di dalam surah *al-An'am* ayat 51 :

⁴² ibid h.351

وَأَنْذِرْ بِهِ الَّذِينَ يَخَافُونَ أَنْ يُحْشَرُوا إِلَىٰ رَبِّهِمْ لَيْسَ لَهُمْ مِنْ دُونِهِ وَلِيٌّ وَلَا شَفِيعٌ
لَهُمْ يَتَّقُونَ (٥١)

Ertinya : Dan berilah amaran dengan al-Qur'ān itu kepada orang-orang yang berasa takut bahawa mereka akan dihimpunkan Tuhan mereka (pada hari kiamat), (padahal) tiadalah bagi mereka pelindung dan tidak juga pemberi syafaat yang lain dari Allah, supaya mereka bertaqwa.

Terjemahan Surah al-An'ām(6):51

4.4.7 Metod Amar Ma'rūf Nahi Mungkar

Setiap manusia yang hidup mengidamkan suatu kehidupan yang baik, selesa, aman, damai dan bahagia. Mereka berusaha sedaya upaya untuk mencapai hasrat ini. Manusia adalah makhluk sosial yang tidak boleh hidup berseorangan. Al-Qur'an di dalam surah *al-Hujurā* ayat 13 menerangkan tentang kejadian manusia yang pelbagai bangsa, suku kaum, warna kulit, budaya dan bahasa.

يَا أَيُّهَا النَّاسُ إِنَّا خَلَقْنَاكُمْ مِنْ ذَكَرٍ وَأُنْثَىٰ وَجَعَلْنَاكُمْ شُعُوبًا وَقَبَائِلَ لِتَعَارَفُوا إِنَّ
أَكْرَمَكُمْ عِنْدَ اللَّهِ أَتْقَاكُمْ إِنَّ اللَّهَ عَلِيمٌ خَبِيرٌ (١٣)

Ertinya : Wahai umat manusia ! sesungguhnya kami telah menciptakan kamu dari lelaki dan perempuan, dan kami telah menjadikan kamu berbagai bangsa dan bersuku puak, supaya kamu kenal-kenalan (dan beramah mesra antara satu dengan yang lain). Sesungguhnya semulia-mulia kamu di sisi Allah ialah orang yang lebih taqwanya di antara kamu, (bukan yang lebih keturunan

atau bangsanya). Sesungguhnya Allah maha mengetahui, lagi maha mendalam pengetahuanNya (akan keadaan dan amalan kamu).

Terjemahan Surah al-Hujurat(49):13

Di dalam kepelbagaian itu semua mereka akan bergaul antara satu sama lain. Di dalam pergaulan itu mereka akan menemui pelbagai jenis masyarakat, ada yang baik dan ada yang jahat. Dalam hal ini al-Qur'an menganjurkan supaya ada kumpulan manusia yang sanggup memikul tanggung jawab membanteras perlakuan negatif itu dan sebaliknya menunjukkan jalan ke arah yang perlakuan yang baik. Tugas *amar ma'ruf nahi mungkar* ini merupakan tugas kita sebagai khalifah Allah SWT. Matlamatnya adalah untuk mengeluarkan manusia dari segala penyakit sosial dan perkara-perkara negatif yang menyalahi ajaran al-Qur'an

Amar ma'ruf nahi mungkar ini perlu difahami dalam perspektif yang lebih luas dan bukan pahaman sempit seperti mana yang difahami oleh kebanyakan orang bahawa tugas *amar ma'ruf nahi mungkar* ini adalah tugas guru, ustaz, dan ulama sahaja, akan tetapi ianya adalah tugas semua umat manusia. Firman Allah di dalam surah *Ali Imran* ayat 104 :

وَلْتَكُنْ مِنْكُمْ أُمَّةٌ يَدْعُونَ إِلَى الْخَيْرِ وَيَأْمُرُونَ بِالْمَعْرُوفِ وَيَنْهَوْنَ عَنِ الْمُنْكَرِ

وَأُولَئِكَ هُمُ الْمُفْلِحُونَ (١٠٤)

Ertinya : Dan hendaklah ada di antara kamu satu puak yang menyeru (berdakwah) kepada kebajikan (mengembangkan Islam), dan menyuruh berbuat segala perkara yang baik, serta melarang daripada segala yang salah (buruk dan keji). Dan mereka yang bersifat demikian adalah orang-orang yang berjaya.

Terjemahan Surah Ali Imrān(3):104

Di dalam al-Qur'an terdapat banyak ayat yang menyuruh manusia melaksanakan tanggung jawab menyuruh kepada kebaikan (*amar ma'ruf*) dan melarang kemungkaran (*nahi mungkar*), dan ianya adalah salah satu metod atau kaedah al-Qur'an di dalam menangani krisis moral dan penyakit sosial di dalam masyarakat.

Al-Qur'an mendidik umat Islam supaya berusaha secara kolektif untuk mengeluarkan manusia dari segala krisis moral dan penyakit sosial yang semakin banyak timbul di tengah-tengah masyarakat moden hari ini, demi kebahagiaan dan kesesuaian hidup bermasyarakat. Tugas *amar ma'ruf nahi mungkar* ini dibebankan kepada kita kerana kita adalah sebaik-baik umat⁴³ seperti mana firman Allah SWT di dalam surah *Ali Imrān* ayat 110 :

كُنْتُمْ خَيْرَ أُمَّةٍ أُخْرِجَتْ لِلنَّاسِ تَأْمُرُونَ بِالْمَعْرُوفِ وَتَنْهَوْنَ عَنِ الْمُنْكَرِ وَتُؤْمِنُونَ

بِاللَّهِ (١١٠)

Ertinya : Kamu (Wahai umat Muhammad) adalah sebaik-baik umat yang dilahirkan bagi (faedah) umat manusia, (kerana) kamu menyuruh berbuat segala perkara yang baik dan melarang daripada segala perkara yang salah (buruk dan keji), serta kamu pula beriman kepada Allah (dengan sebenar-benar iman).

Terjemahan Surah Ali Imrān(3):110

Usaha *amar ma'ruf nahi mungkar* ini mestilah bermula dengan pembentukan individu dahulu kerana diri yang baik lebih berkesan untuk

⁴³ ibid juz 2 h.114

mendidik orang lain. Kerana ia melambangkan kebaikan dan menjadi contoh serta model. Dari individu yang baik ia akan membentuk keluarga yang baik pula. Beberapa keluarga yang baik akan membentuk masyarakat yang baik.

Penanganan krisis moral dan penyakit sosial melalui kaedah dan metod *amar ma'ruf nahi mungkar* ini dapat melatih diri manusia berbuat baik dan menjauhi perkara kejahatan di samping dapat membentuk dan membina akhlak serta kepribadian masyarakat dan mecegah dari bertindak mengikut kehendak hawa nafsu yang mendatangkan kerosakan. Adapun cara-cara untuk melaksanakan metod *amar ma'ruf nahi mungkar* ini dalam menangani krisis moral dan penyakit sosial haruslah dengan ajaran dan suruhan yang baik, sepertimana firman Allah SWT di dalam surah *al-A'rāf* ayat 199 :

خُذِ الْعَفْوَ وَأْمُرْ بِالْعُرْفِ وَأَعْرِضْ عَنِ الْجَاهِلِينَ (١٩٩)

Ertinya : Terimalah apa yang mudah engkau lakukan, dan suruhlah dengan perkara yang baik, serta berpalinglah (jangan dihiraukan) orang-orang yang jahil (yang degil dengan kejahilan).

Terjemahan Surah al-A'rāf(7):199

4.5 Kesimpulan

Apabila kita perhatikan metod-metod yang digunapakai al-Qur'an dalam menangani krisis moral dan penyakit sosial yang telah dibahaskan di atas dapatlah kita melihat bahawa kesemua metod-metod tersebut berkesan dan amat praktikal. Kesemua metod-metod tersebut mengambil kira semua aspek yang ada pada diri manusia, sama ada dari cara berfikir manusia, kecenderungan perasaan, potensi diri serta aspek-aspek penting yang ada dalam diri manusia tersebut. Dan ianya

boleh dipraktekkan oleh sesiapaapun dalam menangani masalah penyakit sosial dan krisis moral tak kira pangkat dan golongan.

Kesemua metod tersebut mempunyai ciri-ciri dan keselamatan yang tersendiri yang secara tidak langsung membuktikan keunggulan al-Qur'ān dalam menangani permasalahan manusia termasuklah penyakit sosial dan krisis moral yang makin memprihatinkan kebelakangan ini.

Metodologi yang digunakan al-Qur'ān dalam menangani krisis moral dan penyakit sosial ini jika dipraktekkan dengan sebenar-benar, maka ia akan dapat menjadi penghalang sebelum terjadinya krisis moral dan penyakit sosial serta dapat pula menjadi ubat selepas berlakunya. Wallāhu A'lam.